

Dèwà Mɛ Ndèmndɛm Bye Mvènnswàɛb Kwàse Lè Jân

Mwũ ñkɔ' dèwà ton se

1 ¹Dèwà ton se ta ywum ye Yesù Kristò kwàsà ßwum ke ndemndem nun sannzi. Mvènnswàɛb ne fee Yesù mbyi nliàs' ywum màzwùm lè mè ci-she byon ßã ßyi ßi limmì swum se ye lànnzi ke kwan kwà' nun. Yesù fyie cikpu' nyon ndɔ' ßã nyí ni kìn ci-she nyon Jân ywum màzwùm shě. ²Jân ðyi tì ku' shìtàkwù ke nywi ywum ye nun yenne hwæn, ywum ye leli ke nywi le' Mvènnswàɛb, kòndi lè lɛjkàem she Yesù Kristò ße lisà'. ³Tòn lwen si lè mwum nyě tã dèwà ton se nzanŋgea ke ñkwìn ßwum nun. Tòn lwen ße tì ku' lè ßwum ßye ta mè ywi' nònnzi, ße ywɔ' ñzǎ' le' ye, ye wai ke ñwum Mvènnswàɛb, ße mwumzi yon. Ntwi' se kwan mɛn ywum màzwùm tì kwukwǎ'.

Mè hwəsi ye Jân fyie lè mè ñkwìn ßwum Yesù shanmɛi ye ke ñgyɔ' Àzì nun

⁴Mùn Jân, mùn ne koi dèwà ton se lè ßwum ßye ke mɛ ñkwìn ßwum Yesù shanmɛi ye ke ñgyɔ' Àzì nun:

Mvènnswàɛb ñgǎnnì byin, à fe byin flɔa. Nun ne ße mbyí, à ni kwe jɛnɛ, à yě tì ßèn kwan ndɔ'. Mè mpùn shanmɛi ßye ðyi ke swi' gba' lwun shon, ße ñgǎnnì ku' byin, ße fe byin flɔa. ⁵Yesù Kristò ne ðyi shìtàkwù she lɛjkàem, à ñgǎnnì tì ku' byin, à fe byin flɔa. Nun ne seti ywi yìnni ke nyinnim ßwum ywi nun, à ße tì m̀vèn ne lǎn ßwùlu mè m̀vèn ke cě ñgyɔ' wan. À tã ßwi' yili, à nywàsà ßwi' ke ßyebbi nye' nun lè mvæb yon. ⁶Li, à fyòsi ßwi' ñkwìn ßwum ßyon ye nun ne ðyi m̀vèn. 'Bwi' tì wě mè ci-mfe sàtikǎ' ke swi' ce nyon Mvènnswàɛb. Ntwu ße lè nun, Yesù Kristò. Ìjkimmɔ' yon ße ðwùmðwùm. **Àmèn.**

⁷Ceèni fe', Yesù Kristò tã kìn ke ßwɔ' nun. Mwum hwæn yě nun yenni lè ze' shon, kwo fe' ßwum ßye wue nun. Ke nyen yon nun, mè pa' ßwum hwæn yě nyàm̀nà' ke ntwi' yon. Lè lɛjkàem, se ye ku' lànnzi li. **Àmèn.**

⁸Nyeli nye' Mvènnswàɛb ne cinni ñkimmɔ' ke nywi ywum hwæn leli le: «Mùn ni ñfunmi ywum hwæn, mùn ße tì ku' m̀mlǎkà' ywum hwæn». Nun ne ße mbyí, à ni kwe jɛnɛ, à yě tì ßèn kwan ndɔ'.

Jân yenne Yesù Kristò ke ndemndem nun

⁹Mùn, Jân, ne ðyi bàka nyin, mùn yě ðyin swum se lannzi mun nywi ke Pàtìmòsi shě. Bwi' lè ðyin, ke bwi' bi bæti lè Yesù Kristò, bwi' ta vènè' yenni mbanmban, bwi' fyimnzi ti son mbanmban, bwi' ti ðwum ke ywo' Mvènnswàb nun mbanmban. Ti mún, be bænni mún, be ken mùn kě ke Pàtìmòsi, kpo ngyc' ndo' se ke nlim ðu', ntwi' se mùn bi le'-Nswàb shě, kònnði lè leŋkàem she Yesù kwàsi mun. ¹⁰Mpùn Mvènnswàb kièn mùn bènni nywi nywo' sonndè ndo', li, mùn ywo' be nyè yém ñkwu mwum ndo' ta leli kimmi, ye ta hwæbli wě bæn, ¹¹lè ye ta le' le: «Swum se wù tã yen hwæn, kò' son ke ðewà nun. Wù fyi son lè mè ñkwìn ðwum ðyém shanmbi nyè mùn yě wù mè myin mè nsòn nyan tannzi: Èfèzè, Simír, Pègàm, Tiàtír, Sàdè, Filàdèfi, kònnði lè Làòdisè.»

¹²Kwan se mùn ywo' li, mùn yònnzi me' bǎ mùn yen mwum ne tã leli lè mùn. Swum se mùn seti yen, à si mè lém shanmbi bye be cie lè **gól**. ¹³Ke nyinnim me lém màzwùm, mùn yen swum ndo' wě mwum. Mwum màzwùm bi lè sàro læbbi ndo' ke nywi, ñkànnndan ye nun kpæmmi ñkwù' nun, be cie yon lè **gól**. ¹⁴Ñnywùn nyon be pwebbi le pwibpwib wě mbem. Me' yon be nyànni wě win. ¹⁵Mè kwù ðyon be nyè' wě ñwum ye be pæli ke win. ñkwu yon be ywùm wě pwòàpwòà. ¹⁶Ke fya' ji yon nun, à kwumnde mè nywæ' bon shanmbi. Káfá' pwu ndo' be nun kwain ke ñwum, she be bon mè fyà' bi. Fli me' shon be ðwùm wě nywo' ne tã ðwùm kimmi.

¹⁷Ke nyen ye mùn yen nun li, mùn switi nun me kwù wě ðwon. Son, à sati mùn fyà' ji yon nywi, à shè lè mùn le: «Ba yi kwen wù, mùn ni ñðunmi ywum hwæn, mùn be ti ku' ñmmlòkà' ywum hwæn. ¹⁸Mùn ni ñzison. Be lè mùn ywiâ, son jene, mùn yimná ywi ñgyimbo'. Mùn cinni ñkimmò' ke nywi ywi lè ñsòn ðwum ywi. ¹⁹Kò' ywum ye wù tã yen ye, wù ðunmi ke nywi ywum ye ta lànnzi jene, a ken bèn ke nywi ywum ye ta kìn be nun. ²⁰Ti lè mè nywæ' shanmbi ye ke fya' ji yém nun ye, lè mè lém shanmbi bye be fo' lè **gól** be, mùn yě wù ñdù' shan kwàsi. Mè nywæ' shanmbi bi mè cikpu' Mvènnswàb bye ta mè ñkwìn ðwum shanmbi nyèm bòn. Mè lém shanmbi bi mè ñkwìn ðwum shanmbi nyèm.»

Ðewà se Yesù fyie lè ñkwìn ðwum ðyon ye ke Èfèzè

2 ¹Mwum màzwùm kònnði mùn shě be le: «Kò' lè cikpu' Mvènnswàb nyè tã ñkwìn ðwum ye ke Èfèzè ðyém bòn, wù shè nun le: Ywo' fe' swum se kwan ke ñwum mwum ne kwumndi mè nywæ' shanmbi ke fya' ji, nun ne tã ti kèn ke nyinnim me lém shanmbi bye be fo' lè **gól**. ²Mùn limmi she se ðyin ta ci. Mùn limmi ti hwum se ðyin ta hwum ke ntwi' yém, lè mfyimni ye ðyin ta mè le' fyimni. Mùn limmi le ðyin yili kan le ðwum nyenea ton ke ñkwìn yin nun. Byin kennzá ðwum bye ta bon ne'

lon le mè ci-ntwum byêm, shìkì bon be be ku', byin ken yen le mè ci-me mbwè' be. ³Byin bænnà ñlim, byin yen vènè' ke ntwi' yêm, kwo fe' li, byin ðwæti kan mwù. ⁴Son, swum fɔ' ndɔ' si kwe she mún tã byebbi ywo ke nywi yin. Swum màzwùm si le byin tà ka tí mún yili wě tà she byin be mún yili mbyí. ⁵Bàkèàni fe' kwan se byin be mún yili ñzwanzwò' ke ndunmi. Son jene, byin wonnzà ñyili màzwùm. Kwebsèni pa' tòn shin, byin ci wě tà she byin ðunme mbyí. Byin shi pa' tòn shin kwebsi, mún yě bèn ke cì shin, mún sheli byin lãem fya'. ⁶Son, ke fya' ndɔ' nun, byin ta tí ku' lwen ndɔ' cí. Lwen màzwùm ni le byin ta ywum ye ðwum Nìkòlà ta ci byìnnɔa, wě tà she mún ku', mún tà yon byìnnɔa.

⁷«Mwum ne cinni mè ywi' nywɔ' le', à nonnzì bon lwen, à ywɔ' swum se M̀p̀ùn Nsanmi tã leli lè mè ñkwìn ðwum byêm. Mwum nyě yě wì ñgyɔ' wan lèan, mún yě nun mbyi wó lè nun ðun ke ndem Mvènnswàb nun, à ji gwùm ñgæ' she ta ñzison fe.»

Dèwà se Yesù fyie lè ñkwìn ðwum byon ye ke Sìmír

⁸Mwum màzwùm shè tí mún be le: «Kɔ' lè cikpu' Mvènnswàb nyě tã ñkwìn ðwum byêm ye ke Sìmír ðón, wù shè nun le: Ywɔ' fe' swum se kwan ke ñwum mwum ne ðyi ñðunmi ywum hwæn, à be tí ku' m̀ml̀òkà' ywum hwæn, mwum ne ywie, à kònddì ywi yìmnì. ⁹Mún limmi mè vènè' ne byin ta yen, mún limmi nzæmzæm ne tà byin bænni. Son, lè leñkæm, byin cinni ñjònddì nyě ñkæmñkæm. Mún limmi tí ku' mè le' m̀byibbɔa ne be ta byin ghe ke nywi. Bwum màzwùm be ta bon ne' lon le mè Yudà, son, mè Yudà be ñan. Ñkwìn ðwum Satæn ye. ¹⁰Ba yi kwen byin lè vènè' se byin ye yen jene. Ceèni fe', Satæn yě ðwum byin ndɔ' ké ke nye ñjè bã nun ðweb byin. Byin ye vènè' yenni a ken wòlì ñgyín wùm. Fyimnzèni mè vènè' ni, kwo fe' she be ye byin wu. Mún yě byin ðàsi fe lè ñzison ðwùmdwùm.

¹¹«Mwum ne cinni mè ywi' nywɔ' le', à nonnzì bon lwen, à ywɔ' swum se M̀p̀ùn Nsanmi tã leli lè mè ñkwìn ðwum byêm. Mwum nyě yě wì ñgyɔ' wan lèan, à bà tí ywi nyě mè m̀bì ywi.»

Dèwà se Yesù fyie lè ñkwìn ðwum byon ye ke Pègãem

¹²Mwum màzwùm kònddì tí shè le: «Kɔ' lè cikpu' Mvènnswàb nyě tã ñkwìn ðwum byêm ye ke Pègãem ðón, wù shè nun le: Ywɔ' fe' swum se mwum ne cinni kãfã' pwu she be bon mè fyà' bí tà wu shě. ¹³Mún limmi le cě byin ton si, Satæn cinni ywɔ' shon kwe. Son, byin bi bæti lè mún, byin yònnzi kan ñyè lè mbyi nyèm, kwo fe' kwan se be wue Àntipà ke nyinnim shin nun, nun ne ðyi ci-ndyi shitàkwù ñkæmñkæm nyèm. Be wue nun ke nsòn yin, cìcì se Satæn tã tòn kwe. ¹⁴Son, swum fɔ' ndɔ' si kwe she mún tã byebbi ywo ke nywi yin. Swum màzwùm si le ðwum byin ndɔ' ta ywum ye Bálãem be lìsà' cí. Bálãem be Bálæk mbyi lìsea lè nun

pyisi ßwum Izràêl ke byebbi nun, bã bon ji nwò' ye ße fee lè mè swàb, bon ci ti ku' ñzàmmi. ¹⁵Ke nyinnim shin nun, byin cinni tí ßwum ndò' bye ta ywum ye ßwum Nikòlà ta lisà' ßwon. ¹⁶Kwebsèni pa' tòn shin. Byin shi pa' tòn shin kwebsi, mùn yě ßèn ke ci shin ke kwan kwæ' nun, mùn ßwì wì lè ßwum màzwùm, mùn kwùlò' bon lè kàfà' she ta mun kwean ñwum se.

¹⁷«Mwum ne cinni mè ywi' nywò' le', à nonnzi bon lwen, à ywò' swum se M̀pùn Nsanmi tã leli lè mè ñkwìn ßwum byêm. Mwum nyě yě wì ñgyò' wan lèan, mùn yě nun ji ndò' fe, nyě ßwum ji kife'. Mùn yě ti ku' nun mwen kpati ñgwò' mpwebbi pwibpwib fe, nyě ße kò' jin nywæb ndò' zwem. Mwum ndò' limmi kan jin si, a shi ße mwum ne tã ku' nun yě.»

Dèwà se Yesù fyie lè ñkwìn ßwum ßyon ye ke Tìàtír

¹⁸Mwum màzwùm kònnði ti ló' shè le: «Kò' lè cikpu' Mvènnswæb nyě tã ñkwìn ßwum byêm ye ke Tìàtír ßón, wù shè nun le: Ywò' fe' swum se kwan ke ñwum Mwen Mvènnswæb, nun ne me' ta nyànni ke mwu wě win, mè kwù nyè' ti wě ñwum ye ße ta pæli ke win nun. ¹⁹Mùn limmi she se byin ta ci. Mùn limmi ñyili ye byin ta ßwùlu yili, lè m̀kpa' ye byin ta ßwùlu kpea. Byin tã ka ñyè yònnzi lè mbyi nyèm, byin ta ñlim ßænni kwan hwæn. Mùn limmi ti ku' le she se byin ta ci jene, se leân she byin ße ci ke ndunmi. ²⁰Son, swum fò' ndò' si kwe she mùn tã byebbi ywo ke nywi yin. Swum màzwùm si le m̀lib ne ße ta lon le Jèzàbêl, nyě tã nun ne' tweli wě ci-nleli ke ñwum Mvènnswæb nun, byin ta nun ñànnzi ke nyinnim shin nun. À tã mè ci-she byêm mbyi ßwuli ke ǹlisà' ye nun tã bon ñzàmmi lisea. À lisà' ti bon njika' me nwò' ne ße fe lè mè swæb. ²¹Mùn ðonnzã nun pon bã nun kwebsi pa' tòn shon, son, à yili kan nun ðonnnzi ñzàmmi yon. ²²Li ne ci, mùn yě nun ñgwènngwènn ndò' fe nywi, à yen vènè' ñzwònzwò'. Mè hwæn ßyon hwæn, mùn yě bon vènè' twun ndò' yennzi, bon shi kwù kèn shan kwebsi, ße ðonnnzi mè she m̀byibbõa nyan. ²³Mùn yě ti ku' ßwen m̀lib ni wu, li, mè ñkwìn ßwum byêm hwæn yě limmi le mùn ne ta mè nlim ßwum cæsi, mùn limmi ti ku' mè m̀bàkà' nyan. Li, mè kikæn ne byin ta ci hwæn, mùn yě byin nun fyòsi.

²⁴«Son, byin ße nzwon ke Tìàtír, byin ßwon kan ñ̀lisà' ywum byibbõa m̀lib ni, shiki byin limmi ku' swum se ßwum ta lon le Ywum Satæn ye gwùmni, mùn shě lè byin le, m̀n cinni kan ndeb ndò' ye mùn yě byin lebbi. ²⁵Suku' ðin le byin ßæn ywum ye byin yuseâ yi lwen han a kiin wòli kwan se mùn yě fyònni. ²⁶Mwum ne yě wì ñgyò' wan lèan, à ci she shêm a ken ßèn ke m̀mlòkà' ñgyìn nun, mùn yě nun ñkimmò' fe bã nun ywò' mè pa' ßwum hwæn ke cě ñgyò' wan. ²⁷Ëkimmò' ye mùn yě nun fe yi, Ce nyèm ne sete mun yon fe. À yě lwun sea lè ñjinnði nun, à yě ßwum byibbõa nywòtea wě tã she ße ta yi kwùkwò' kòn nywòtea. ²⁸Mùn yě ti ku' nun nywæ' ne tã ßwùm moan shikpon fe.

²⁹«Mwum ne cinni mè ywi' nywɔ' le', à nonnzi bon lwen, à ywɔ' swum se Mpùn Nsanmi tã leli lè mè ñkwìn ßwum byêm.»

Dèwà se Yesù fyie lè ñkwìn ßwum byon ye ke Sàdê

3 ¹Mwum màzwùm kònnɔ̀ tì mùn shè be le: «Kɔ' lè cikpu' Mvènnswæb nyě tã ñkwìn ßwum byêm ye ke Sàdê ßòn, wù shè nun le: Ywɔ' fe' swum se kwan ñwum mwum ne cinni mè mpùn Mvènnswæb shanmbi, lè mè nywæ' shanmbi ke fya'. Mùn limmi she se byin ta ci. 'Bwum ta fàkà' le byin bi lè ñzison, kànmbè', byin bi yì ðwon. ²Weàni zwô, byin kimnzi nywi, byin làkì ywi ñgyìnmbò'. Ntwi' se mùn yennà pa' tòn shin, a ba zu' ke me' Mvènnswæb. ³Bàkeàni le ywum ye be lisae byin mbyí, byin ci yon. 'Byin kwebsi pa' tòn shin. 'Byin shi yìmmi dye nun, mùn yě byin semnzi wě ci-nywi', shikì byin limmi kwan se mùn ßèn. ⁴Son, byindɔ' lè ßwum bi kwe Sàdê, be ñgasi kan mè plè byan. Ti lè bon, ßwi' ye kèn ßwi' lè bon mbanmban lè mè plè pwibbɔa nywi. Ntwi' se kwù kèn shan si lwen wě tã she mùn yili. ⁵Mwum ne yě wì ñgyô' wan lèan, be ye nun plè pwebbi pwibpwib swí ke nywi. Mùn bã jin shon zùsi ke dèwà she be kɔà mè myin ßwum be cinni ñzison ðwùmðwùm. Mùn yě shè ke swi' Ce nyèm, kònnɔ̀ ke swi' me cikpu' byon le mwum ne ti ñyèm.

⁶«Mwum ne cinni mè ywi' nywɔ' le', à nonnzi bon lwen, à ywɔ' swum se Mpùn Nsanmi tã leli lè mè ñkwìn ßwum byêm.»

Dèwà se Yesù fyie lè ñkwìn ßwum byon ye ke Filàdèfi

⁷Mwum màzwùm kònnɔ̀ mùn shě le: «Kɔ' lè cikpu' Mvènnswæb nyě tã ñkwìn ßwum byêm ye ke Filàdèfi ßòn, wù shè nun le: Ywɔ' fe' swum se kwan ke ñwum mwum ne ðyi ñsanmi, à be tì ci-leñkæm. Nun ne cinni kyí mvèn Dàvíð ke fya', nun ne tã ñwum ßònmbiyi wò shikì mwum ndɔ' cinni ñkimmɔ' ndwɔ' be. À ðwɔ' tì ñwum ßònmbiyi shikì mwum ndɔ' cinni ñkimmɔ' ñwò be. ⁸Mùn limmi she se byin ta ci. Mùn limmi ti ku' le byin bi swublea. Kwo fe' li, byin ywɔlã ñwum yêm, byin byinno' kan mun ke ñkwìn ßwum nun. Mùn wòá ñwum mbyi ndɔ' ke swi' shin, mwum ndɔ' wòli kan kim à ðwɔ' yon. ⁹Ceèni fe' swum se mùn yě ci lè ñkwìn ßwum Satæn, bon be ta bon ne' lon le mè Yudà, son, mè mɔwè' be, be ba mè Yudà. Mùn yě bon ðòlè' cǐ, be kiin swummi ke swi' shin. 'Be ye limmi lè bon ne' le mùn yili byin. ¹⁰Ke byin ywæ ñzæ' le' ye mùn be byin shě le fyimnzèni mè vènè', mùn ku', mùn yě konni lè byin. Vènè' ndɔ' ye bèn ke nywi kwo wen ne hwæn ne cě ñgyô' wan zwem bã a kiin nun bwebbi. Son, mùn yě cì, vènè' màzwùm bã byin bènni ke nywi. ¹¹Kwan nzwonme kwæ', mùn yě bèn. 'Dyièni kimmi ke ywum ye byin yuseá nun, lè mwum ndɔ' làkì ðàsi nyin yě. ¹²Mwum ne yě wì ñgyô' wan lèan, mùn yě nun ðyili wě kwù nye ke nye Mvènnswæb nyèm nun. Swum ndɔ' she ye tì nun kwannzi be ba tí be. Mùn yě jin Mvènnswæb nyèm kɔa ke nywi

nyon, m̀n kɔ' tì ku' jin nsõn Mvènnswàb nyèm ke nywi nyon. Jin nsõn màzwùm si le Yèrusàlèm she nywàb. M̀vènnswàb yě son kyilli ñwai ye ke ðeb. M̀n yě tì ku' jin nywàb ndɔ' she m̀n ke nywi kɔa ke nywi yon.

¹³ «Mwum ne cinni mè ywi' nywɔ' le', à nonnzi bon lwen, à ywɔ' swum se M̀pùn Nsanmi tã lèli lè mè ñkwìn ðwum byêm.»

Dèwà se Yesù fyie lè ñkwìn ðwum byon ye ke Làòdisé

¹⁴ Mwum màzwùm kòndi shè le: «Kɔ' lè cikpu' M̀vènnswàb nyě tã ñkwìn ðwum ye ke Làòdisé ðõn, wù shè nun le: Ywɔ' fe' swum se kwan ñwum mwum ne ðe ta lon le **Àmèn**. Nun ne ðyi shitàkwù ñkàmñkàm M̀vènnswàb, nun ne mè m̀wè' tã ka kwan ñwum. Nun ne ðyi mwù ywum fõ M̀vènnswàb hwæn. ¹⁵ M̀n limmi she se byin ta cì. M̀n limmi le byin ba wě mlá' twènnɔ', shikì byin ðe ku' wě ye fɔa. Ke nyinnim ywum ði yi nun, m̀n yili le byin ðe swum fɔ'. ¹⁶ Son, ke byin ði m̀n ñwum wě mlá' yeli, m̀n yě byin gbui ðe. ¹⁷ Byin ta shè le byin ði mè ci-njõndi, byin cinni ywum m̀ean, swum ndɔ' tã ka byin shi. Son, byin limmi kan m̀bòkì ne byin ði mè ci-nzæmzæm, byin ði mè nshi, byin ðe tì mè nywi pwinpwìn, ðwùbè kòndi' tì zwem. ¹⁸ M̀n tã byin ndeb lebbi le: kiènni byin hwin **gól** ke fya' yêm, nyě ðe sannzã lè win, ðã byin ðe mè ci-njõndi. Byin kiin mè plé pwibbɔa hwinni tì ku', li, kwènnjin kèn ci' pwin bà tì byin cí. Byin kiin tì ku' mvili me' hwinni ðã byin ðunmi tì yenni ðe. ¹⁹ Limmèni le, ðwum ðe m̀n yili, bon ðe m̀n tã swemzi, ðã m̀n kòndi bon kon ke mwu. Ke à si li, kèèni mwù ke she nun, byin kwebsi pa' tòn shin. ²⁰ Ywɔèni fe', m̀n tã ðyi ke ñwum ðònmbi lè m̀n ci akyilà'. Beshe mwum ndɔ' ywɔ' ñkwu yêm, à wò m̀n nye, m̀n yě ðun ke nye nyon, ðwi' ji ji ðwi' lè nun m̀banm̀ban. ²¹ Mwum ne yě wì ñgyɔ' wan lèan, m̀n yě nun kwemzi ke ke shêm, à kìn tòn ke gba' lwun shêm zwem lè m̀n m̀ban, wě tã she m̀n ku', m̀n lèan ñgyɔ' wan, m̀n kèn tòn ke gba' lwun fɔ' nun ðwi' lè Ce nyèm.

²² «Mwum ne cinni mè ywi' nywɔ' le', à nonnzi bon lwen, à ywɔ' swum se M̀pùn Nsanmi tã lèli lè mè ñkwìn ðwum byêm.»

Ñtwuli ye ðe ta M̀vènnswàb twuli ke ðeb

4 ¹ Ke nyě yi, m̀n lèmnze tì ñdèmndem ndɔ' le ñwum nye ndɔ' ðe lwon ke ðeb. ñkwu mwum ye m̀n ywɔe m̀byi, ye ðe hwæbli wě ðæn, ye she m̀n le: «Nèain fe, m̀n yě wù ywum ye ye lànnzi ke kwan kwæ' nun lisea.»

² Ke fya' zwem ñnywèn, M̀pùn M̀vènnswàb kìn m̀n ðènni nywi. Li, m̀n yen gba' lwun M̀vènnswàb kwe nlim ðeb. Ke gba' màzwùm zwem, mwum ndɔ' ðe kwe ñji' ñtònmi. ³ Fli me' shon ðe ðwùm nùn, lè a ta ðwum me' she ke mwu wě mè ñgwò' lwukea ndɔ' ðye ðe ðe lon le jæsipè bon lè sàdwân. Ñsè' ndɔ' kanndi gba' lwun màzwùm, ye ðe tì ku' ðwum

me' she ke mwu wě ñgwò' nlwen ndò' ne be be lon le èmèròdè. ⁴Ke mbeti gba' lwun, yi gba' yindo' be ti kwe mwum bí flàn nyí, ye kanndi gba' lwun si. Bwumñkæm mwum bí flàn nyí be zwem tònñgea lè mè plé pwibboa ke nywi. Be be ti ku' lè mè tæm lwun ke mwu. Be cie mè tæm màzwùm lè **gól**. ⁵Mbàn be ñwàti ñwai ye kwe gba' lwun zwem, lè à tã hwæbli. Mè kaki shanmbi be kwe swi' gba' lwun nyàenni. Mè kaki màzwùm be mè mpùn Mvènnswæb shanmbi. ⁶Swum ndò' be ke swi' gba' lwun wě ðu' ndwun, se be ðwùmna' wě dànnnglè'. Se be pwebbi le pwibpwib.

Ywum ndò' be kwe nyí ye kanndi gba' lwun ke ñgyò'. Ywum màzwùm be ñzison, ye cinni me' cici hwæn, ke swiswi' lè ke nyè. ⁷Swum she zwimbyi' gwili gbêm. She me mbi gwili mwen nà'. She me nlè cinni fli me' wě she mwum. She me nnyi gwili mbyi' nyè tã ði. ⁸Ywum màzwùm, kwo wen cinni mè kwèb fyuru-fyuru. Be cinni me' cici hwæn, ke nlimnim lè ke pisean. Kpòn lè nywò', be ta su' tòn lè ñshib. Be be shib le: «Sanmi, sanmi, sanmi, wù ni Nyeli nye' Mvènnswæb ne cinni ñkimmò' hwæn. Wù ne be mbyí, wù ne ti jene, wù ne ye bèn kwan ndò'!» ⁹Li, ywum ye cinni ñzison yi ta ñshib shibbi lè Mvènnswæb. Be sakà' nun, nun ne ðyi ke gba' lwun zwem ñtònmi, be twuli nun ne cinni ñzison kwan hwæn, be konndi ti nun osòkò' yili. ¹⁰Yi kwan hwæn ye bon be ci li, ki-mwum bí flàn nyí ðwumñkæm bi kiin swummi ke swi' Mvènnswæb, be twuli nun, nun ne cinni ñzison kwan hwæn. Be zwe' mè tæm byan bi, be sati bon ke me kwù byon, lè be ta le' le:

¹¹ «Ce ndwun Mvènnswæb, wù ne ðyi Nyeli nye'.

À si lwen le ðwum fe wù ñtwu, be mwumntzi wù, be kwula' ñkimmò' ywù,
ntwi' se wù ne fò' ywum hwæn.
Ñyili ywù ye ci, ywum hwæn be kwe.»

Dèwà se Mwen Nzumngan Mvènnswæb bænnne ke fya'

5 ¹Mùn yenne dèwà ndò' ke fya' mwum ne be ke gba' lwun zwem ñtònmi. À bænni son ke fya' ji. Ke dèwà màzwùm nun, be kœ son mè fyà' bí hwæn. Be lilò' son lè mè mbu' kyì cici shanmbi. ²Mùn yen ti cikpu' Mvènnswæb ndò', à ðunmi leli lè ñkwu kimmi, lè à tã cibbi le: «Yà mwum ne cinni ñkimmò' ñketa' me mbu' kyì be, à wèli dèwà se?» ³Son, mwum ndò' be kăn, kwo fe' ke ðeb, kwo fe' ke cě ñgyò' wan, kwo fe' ke nsòn ðwum ywi, nyè wòli kim à wèli dèwà si, à ce ke nlim. ⁴Mùn mgbinnò' lè ñkwe, ntwi' se mwum ne wòli kim, à wèli dèwà si, à ce ke nlim be kăn. ⁵Son, mwumñkæm ndò' shè lè mùn le: «Ba wù kwe, ce fe', gbêm ne kwan ke ðwon Judà nun, à ni ke mvu ðwum mvèn Dàvid nun, à lêân mè ci-byinnzi byon ke wì nun, à wòli kim à keta' mè mbu' kyì shanmbi bi, à wèli dèwà màzwùm.»

⁶Ke nyè yi, mùn yen tì mwèn nzwumngan ke swi' gba' lwun òdyi. À bi ke nyinnim òwumngkàm mwum bì blàn nyí bi, lè ywum nyí ye cinni òzison yi. À be wè be wuâ nun nùn. À cinne mè nzwu ke mwu shanmbi, à cinne tì mè me' ke mwu òshanmbi. Mè me' màzwùm ne dyi mè mpùn Mvènnswàb shanmbi ne nun tã fyi ke ngyô' wan nun hwæn. ⁷Mwèn nzwumngan ni senndô', à yè dèwà se be ke fya' ji mwum ne òtònmì ni. ⁸Kwan se nun yèe dèwà si, ywum ye cinni òzison nyí yi kièn swummi ke swi' shon lè òwumngkàm mwum bì blàn nyí bi hwæn. Wen ne hwæn cinni mbe' ke fya', à cinni tì kwèb ne be ci lè **gól**. Mè kwèb màzwùm be lwinnà lè mè wò' me nwùm ye lwen. Ye lisa' mè òkeli òwum Yesù. ⁹Be òdunmi òshib nywàb ndò' shibbi le:

«Wù cinni òkimmò' nsheli dèwà, wù keta' mè mbu' kyì,
Ntwi' se be wue wù, li, ke nyè ywi nywù, wù libbeà òwum mèan lè
mvàb ywù.

Kwo fe' she òn cinni yì kwæ' nywi kyikyì,
be cinni mè òkyìn le' òwum kyikyì,
be wai tì ke me ngyô' nun kyikyì si,
wù tèlâ òn hwæn ke cè Mvènnswàb.

¹⁰Li, wù fyòsì òn òkwìn òwum byù ye wù ni Mvèn,
be be tì mè ci-mfe sàtikè' ke swi' Mvènnswàb.
Be ye lwun sea ke ngyô' wan nun.»

¹¹Mùn kònddì ce be, mùn yen òkwìn me cikpu' Mvènnswàb be be kwe màbtea, mwum wòli kan à tan òn. Be kànddì gba' lwun lè ywum nyí ye cinni òzison yi, kònddì lè òwumngkàm bi. ¹²Be òdunmi òshib shibbi lè òkwu kimmi le:

«Mwèn Nzwumngan Mvènnswàb ne be wue, à cinni òkimmò' hwæn,
à ni lè òjònddì hwæn, à cinni òlìmmì hwæn,
à lán ywum hwæn lè òkimmò'.
A si lwen le òwum mwumzi nun,
be fe nun òtwu, be sakà' nun.»

¹³Li, mùn ywò' ywum hwæn ye Mvènnswàb fòe ye ke dèb, ye ke ngyô' wan, ye ke mla' nji, kònddì lè ye ke nsòn òwum ywi, ye ta òshib ndò' shibbi yon hwæn le:

«Bwi' feèni òtwu lè mwum ne ke gba' lwun zwem òtònmì òn lè
Mwèn Nzwumngan.

Bwi' mwumzi òn, bwi' sakà' òn,
òkimmò' hwæn yi lè òn kwan hwæn.»

¹⁴Ywum nyí ye cinni òzison yi be fyònnzi le: «**Àmèn**». Li, òwumngkàm bi ken swummi ke swi' gba' lwun, be òdunmi òn mwumzi.

Mè mbu' kyì shanmbi

6 ¹Kwan se Mwèn Nzwumngan yèe dèwà si, mùn yen à keti mbu' kyì m̀bò'. Ke nyè yi, mùn ywò' òkwu ndò' fò' ke nyinnim ywum nyí ye

cinni ñzison yi nun, ye ta hwæbli wě mbæn lè ye ta le' le: «Kîîn!» ²Mùn yònnzi me', mùn yen nyæmbàli mpwèbbi ndò'. Mwum ne nèan nun ke nyè be lè le ke fya'. Be swon nun tàem lwun ke mwu. Ke nyè yi, à wa' kën ndwí wí, bǎ nun lan ðwum. À tǎ ðwum wí lèan kwan hwæn.

³Mùn yen tì be, Mwen Nzwmunggan keti tì mbu' kyì nyè mè mbi. Mùn ywǎ' ñkwu ye me mbi ke nyinnim ywum nyí ye cinni ñzison yi nun, ye ta le' le: «Kîîn!» ⁴Ke nyè yi, nyæmbàli nyè ðin kwain tì. À be mpèan. Be fèe mwum ne nèan nun ke nyè ñkimmǎ' nlæmnzi wí ke ñgyǎ' wan nun hwæn bǎ ðwum ðunmi bon ne' wusi ke nyinnim shan nun. Be fe nun kǎfǎ' lǎbbi ndò' fya'.

⁵Ke nyè yi, Mwen Nzwmunggan keti tì mbu' kyì nyè mè nlè. Mùn ywǎ' ñkwu ye me nlè ke nyinnim ywum ye cinni ñzison yi nun, ye ta le' le: «Kîîn!» Mùn wasi me', mùn yen nyæmbàli nlo. Mwum ne nèan nun ke nyè be lè kilò ke fya'. ⁶Mùn ywǎ' ñkwu ndò' wě ye mwum, ye ta wai ke nyinnim ywum nyí ye cinni ñzison yi nun, ye ta le' le: «Hawǎ wǎ' zængǎ' fǎ' ye ji lǒn ñkæm, hawǎ wǎ' gwé fǎ' ye tì ku' ji lǒn ñkæm nlè. Son, tì lè mèwu lè bǎ', ba wù kimnzi sém nyan.»

⁷Ke nyè yi, Mwen Nzwmunggan keti tì mbu' kyì nyè mè nnyì. Mùn ywǎ' ñkwu ye me nnyì ke nyinnim ywum nyí ye cinni ñzison yi nun, ye ta le' le: «Kîîn!» ⁸Mùn wasi me', mùn yen nyæmbàli ñkwinni ndò'. Mwum ne nèan nun nyè, jin shon be le Ywi. Nǎ' ne jin shon be le Nsòn-ðwum-ywi be nun ðwonngæa be nyè. Be fe bon ñkimmǎ' ke fya' ñgyǎ' fǎ' nun bǎ bon wu ðwum kwe. Be ye byindo' wu lè kǎfǎ', ñjè wu tì byindo'. Byindo' ye mè ñgwèngwèngwèn ywi. Byindo' ku', mè nyæm ye bon wu.

⁹Ke nyè yi, Mwen Nzwmunggan keti tì mbu' kyì nyè mè nshæn. Li, mùn ce ke ñji cí mfe sàtikǎ', mùn yen mè mpùn ðwum bye be wue ke ñgyǎ' wan ntwi' se be le' Mvènnswæb shé lè ðwum. ¹⁰Be ðunmi leli lè ñkwu kimmi le: «Nyeli nye' ne cinni ywum hwæn, wù ne ðyi ñsanmi, wù be tì ci-leñkæm, yǎ kwan se wù yé ðwum be wue ðwi' mè kǎ' lǎnnzi? Yǎ kwan se wù yé bon vènè' yennzi, wù wìn ñjì ye'?» ¹¹Li, be fe kwo wen ke nyinnim shan nun sàro pwebbi fǎ'. Be she bon le byi bi bonngǎ' fe' kwan kwæ', a ken wòli kwan se be ye tì ku' mè ñgyinni mè ci-she byan wu wě tà she be wue ku' byi.

¹²Ke nyè yi, Mwen Nzwmunggan keti tì mbu' kyì nyè mè mfyuru. Ke ñketi ye nun keti li, mùn yen ñgyǎ' funnzi lè kim. Zæ' nywǎ' fyonnì lo wě plè nshí ywi, nywi' fyònnì tì ku' mpèan wě mvæb. ¹³Mè nywæ' ðunmi lè ñwai ye ke zwò ðeb lè be ta pyitài ñgyǎ' wě ñjì ngǎ' ne mpùn ta funnzi, gwùm nyon ðunmi lè keke'. ¹⁴Ðeb nywuka' wě kè ndò' se be ta hwe'. Mè kpa' senndea ke yi cí tòn yan, lè yì kpo ñgyǎ' ke nlim ðu' nun hwæn. ¹⁵Bwum hwæn ðunmi gwùmni. Byindo' ken ðun ke yi mvù nun, byindo' ke yi pon me ñgwǎ' bye ke me kpa' zwem. Mè mvèn klwøkea bon lè ðwumñkæm byan be kwe. Mè ci-zwi' me suzæn, mè ci-ñjònnði, lè ðwum

bye wùlænndi shan ta kèn be tì kwe. 'Bon hwæn, kwo fe' mè son, kwo fe' ßwum bye be lè mè mwù nyan, be ken gwùmni. ¹⁶Be ðunmi shè lè mè kpa', kònndi lè mè gan ngwò' le byi bi swinì bon ke nywi, byi bi gwumnzì bon, bǎ mwum ne tòn ke gba' lwun zwem làkì bon yenni, lè Mwen Nzwumngan làkì bon vènè' yennzi. ¹⁷Ntwi' se kwan nlànnzì me kàè' wolâ. Mwum ne yè ðyi nywò' màzwùm zwô, mbo' bǎ be.

Bwum bye be ðænni m̀bù' ke nywi

7 ¹Ke nyè yi, mùn yen tì mè cikpu' Mvènnswàb nyí, be be ðyikea ke me mbeti ngyó' wan. 'Be be mpùn twó' bǎ nyí ni làkì ðwi ke ngyó' zwem, shìkì nyí ni ðwi ku' ke mla' zwem, nyí ni làkì tì ku' man ngæ' funnzi. ²Mùn yen tì cikpu' Mvènnswàb ndò' ne be wai ke ßwùm-nywò' lè à ni lè swum ndænn m̀bù' ke fya'. Swum màzwùm se be ta ßwum Mvènnswàb ne ðyi ñzison m̀bù' ðænni nun ke nywi. Cikpu' Mvènnswàb ni kun lè ñkwu kimmi, lè à tǎ le' lè mè cikpu' Mvènnswàb nyí bye cinne ñkimmò' m̀busi ngyó' wan, à shè lè bon le: ³«Ba kì byin gwannzì fe' ngyó' bon lè mlǎ', shìkì byin gwannzì ku' mè ngæ'. Donnzèni ðwi' ðinnà' fe' mè m̀bù' ke swi' me ci-she Mvènnswàb nye!.» ⁴Li, be teân mùn ßwum bye cinni mè m̀bù' màzwùm ke nywi. 'Be be ßwum ñkæm ndu' lè ßwum ñkæm mwùm nyí blàn nyí. 'Bwum màzwùm wa' hwæn ke me ðwòn bye ke Ìzràèl nun. ⁵Bye kwan ke ðwon Judà nun be ßwum ñkæm wùm blàn bì bye be ðænne m̀bù' ke nywi. 'Bye kwan ke ðwon Rùbèn, à bi ñkæm wùm blàn bì. 'Bye kwan ke ðwon Gádè nun, à bi ñkæm wùm blàn bì. ⁶Bye kwan ke ðwon Àsèr nun, à bi ñkæm wùm blàn bì. 'Bye kwan ke ðwon Nàtálì nun, bon ku', be bi ñkæm wùm blàn bì. 'Bye kwan ke ðwon M̀anàsè nun, be be tì ku' ñkæm wùm blàn bì. ⁷Bye kwan ke ðwon Simèòn nun, be be ñkæm wùm blàn bì. 'Bye kwan ke ðwon Lèví nun, à bi ñkæm wùm blàn bì. 'Bye kwan ke ðwon Ìsàkà nun, be be ñkæm wùm blàn bì. ⁸Bye kwan ke ðwon Zàbùlòn nun, be be tì ku' ñkæm wùm blàn bì. 'Bye kwan ke ðwon Jòsè' nun, be be tì ku' ñkæm wùm blàn bì. 'Bye kwan ke ðwon Bènjàmèn nun, be konndi tì ku' be ñkæm wùm blàn bì.

Ñkwìn ßwum mèan ye ðyi ke swi' Mvènnswàb

⁹Ke nyè yi, mùn yen ñkwìn ßwum mèan ndò' ye mwum wòle kǎn kim à tan. 'Bwum màzwùm, be wai ke ngyó' wan nun hwæn. 'Be cinni yì kwæ' nywi kyikyì. 'Be cinni tì mè ñkyìn le' ke ñwum kyikyì. 'Be be ðyikea ke swi' gba' lwun lè ke swi' Mwen Nzwumngan. 'Be be lè mè plè pwibboà ke nywi, be be tì lè man sea ke fya' binnea. ¹⁰Be ðunmi kun lè ñkwu kimmi, lè be ta le' le: «Mvènnswàb nye' ne ðyi ke gba' lwun zwem ñtònmi ne swætâ ðwi'. Mwen Nzwumngan tì ku' swætâ ðwi!.» ¹¹Mè cikpu' Mvènnswàb hwæn kanndi gba' lwun bon lè ßwumñkæm bi, kònndi lè ywum nyí ye cinni ñzison yi. 'Be swinì ke swi' gba' lwun, be wu mè mwù

ngyɔ'. Be dunmi Mvènnswàb mwumzi, ¹²lè be ta le' le: «À si li, Nyeli nye! Mvènnswàb cinni ñkimmɔ', à ni lè ñllimmi hwæn, à làn ywum hwæn lè ñkimmɔ'. Bwi' yilèni nun osòkò', bwi' mwumzi nun, bwi' fe nun ñtwu kwan hwæn. Àmèn.»

¹³Mwumñkàm ndɔ' ke nyinnim bɔwumñkàm bi cibbi lè mún le: «Mè wen be lè mè plè pwibbɔa ke nywi bi? 'Be wa' fɛn?» ¹⁴Mún fyónnzi lè nun le: «Mún limmi kan mun bon. Mwumñkàm, wù ne limmi ku' bon.»

À kà shě lè mún le: «Bwum bye be yennze vènè' kwan se ñgyɔ' wan be lè à ywime mlò' be. 'Be dyie kimmi ke mbyi Mvènnswàb nun, be sabbà mè plè byan ke mvàb Mwen Nzumngan Mvènnswàb nun, be fyónni pwèbbi le pwibpwib.» ¹⁵Li ne ci, à bi kwan hwæn dyieka ke swi' gba' lwun Mvènnswàb, be ta nun she cí kpòn lè nywɔ' ke nye nyon nun. Mwum ne ke gba' lwun zwem ñtónmi tá konni lè bon. ¹⁶Ñjè bà tí bon kwènni, ñlim bà tí ku' bon fyó. Nywɔ' bà tí bon nyeni ke nywi, shiki twènnɔ' ndɔ' ci tí ku' bon. ¹⁷Ntwi' se Mwen Nzumngan ne ke swi' gba' lwun yě be ci-mbòn nyan. À yě bon kènnzi ke mwu dú' ye ta ñzison fɛ. Mvènnswàb yě bon mè dú' ló me'.

Mbu' kyì nyě mè nshanmbì

8 ¹Mwen Nzumngan keti mbu' kyì nyě mè nshanmbì ne be ke dèwà zwem. Kwan se nun keti nun, ywum hwæn ke dɛb maki ponpon, a ken wòli swum kitò' hawà. ²Ke nyě yi, mún yen mè cikpu' Mvènnswàb ndɔ' dyieka ke swi' Mvènnswàb, bon shanmbì. 'Be fe wen ne hwæn bæn ke fya' fɔ'.

³Cikpu' Mvènnswàb mbɔ' ndɔ' kìn dýi ke moan cíci mfe sàtikà' she be ke swi' gba' lwun Mvènnswàb. À be lè kòn ndɔ' ke fya' she be bɔwemme lè gól. Kòn màzwùm se be be mè wò' me nwùm ye lwen twènni ke nlim. 'Be fe cikpu' ni mè wò' me nwùm ye lwen ke fya' mèn bǎ nun twen yon ke cíci mfe sàtikà' si. À fe Mvènnswàb yon lè mè ñkeli ñkwìn bɔwum Yesù mban. ⁴Ñtwèn ye nun twènnè mè wò' me nwùm lwen yi, kyì be nun dɔw ke fya', lè ye ta nàn ke cí Mvènnswàb lè mè ñkeli ñkwìn bɔwum byon mban. ⁵Kwan se cikpu' Mvènnswàb ni mlò' hwæn, à sheli kòn màzwùm, à lwinnzi son lè win ye nun tweli ke cí mfe sàtikà'. Ke nyě yi, à dɔwi kòn si ñgyɔ' zwem. Kwan se nun dɔwi son li, mban ñwàtì, à hwæbli kimmi, ñgyɔ' wan kònnɔ' tì funnzi.

Yì bæn shanmbì

⁶Li, mè cikpu' Mvènnswàb shanmbì bye be lè yì bæn ke fya' dunmi le' nlwon màzwùm fòsi.

⁷Cikpu' Mvènnswàb nyě zwimbyi' lwon bæn shon. À lwonme li, mè lila' dunmi swi' ke ñgyɔ' wan, ye bi fyinnɔa lè win nun, kònnɔ' lè mvàb. Fyà' ñgyɔ' fɔ' fya' hwæn. ñgæ', lè kæ' floa ye be kwe fya' hwæn.

⁸Ke nyě yi, cikpu' Mvènnswàb nyě mè mbì lwon tì ku' b'àn shon. Swum ndo' be wě kpa' ndwun ndo' ne yě win, be sheli nun, be ken nun d'wìo' ke du' ndwun nun. Fyà' du' fo' màzwùm fyonnì mvàb. ⁹Ywum ye Mvènnswàb f'be ye be tòn kwe cìcì màzwùm ywika' hwæn. Mè cì' klwàkea bye be kwe gwanngà' hwæn.

¹⁰Ke nyě yi, cikpu' Mvènnswàb nyě mè nlè lwon b'àn shon. Nywæ' ndwun ndo' ne be nyànnì wě kaki wai ke nlim d'eb, à pyì ke me mwù du', lè mè du' be be ke fya' ñgyo' fo' nun. ¹¹Jin nywæ' màzwùm be le ñgæ'-ndwí. Fyà' me du' màzwùm fyonnì d'wikea. Li, màn b'wum ywie ke nnwi ye bon nwie mlà' màzwùm ntwi' se be lè ye ti lè d'un ke nlim.

¹²Cikpu' Mvènnswàb nyě mè nnyi lwon b'àn shon. Nywo' bon lè nywi', kònnndì lè mè nywæ', be shimnda' mè fyà' mbò'-mbò'. Li, be d'wùm kan tí lwen. Nywo' be d'wùm, à su' mè nyinnì, à pyì kan kwàbbi, shìkì nywi' pweb ku', à wannzi shikpon.

¹³Be lè mún ke ywum ton yi cè fya', mún yen mbyi' ndo' tã dí ke nlim zwò, lè à tã kun lè ñkwu kimmi le: «Oyì! Yá ñgheli vènè' se lan wan ye yen kwan se mè cikpu' Mvènnswàb lè bye fo' ye tì kònnndì yì b'àn yan lwon.»

9 ¹Ke nyě yi, cikpu' Mvènnswàb nyě mè nshæn lwon b'àn shon. Mún yen nywæ' ndo' wai ke zwò d'eb, à pyì ke ñgyo' wan nun, be fe nun kyì bǎ nun wò ñwum swu' win jimmi. ²Kwan se nun wò ñwum swu' màzwùm, kyì d'unmi d'wu' wě win m'ean ndo' ye be banni kwe. Kyì màzwùm ken zæ' nywo' shìmndi. Njimmi pyì. ³Mè kitàè' d'unmi kwan ke mbu' kyì màzwùm nun, be lú ñgyo' wan hwæn. Be fe bon ñkimmò' fya', be be wě yì kèblè. ⁴Be kà shě lè bon le, ba byi bi lwum kæ' ndo' ji, shìkì byi bi gwannzi ku' ñjì ñgæ' ndo'. Kwo fe' ywum ye ta twàb ke cě ñgyo' zwem, ba byi bi lwum yinnndì. Son, byi bi suku' b'wum bye Mvènnswàb d'æn kan mbù' ke swi' vènè' yennzi. ⁵Be fe kan mè kitàè' bi mbyi bǎ byi bi wu b'wum nùn, son, byi bi suku' byi vènè' yennzi ke me nywi' shæn nun. Vènè' màzwùm se ye be wě kwan se kèblè ta mwum tæbbi. ⁶Ke kwan màzwùm nun, b'wum ye mbyi ywi kæbbi bǎ bon ywi, son, be ba cinni. Ywi yě bon ñlim kwènni, son, swum se ye cì ywi b'æn bon ba be.

⁷Mè kitàè' màzwùm be wě mè nyǎmbàlì ndwí wì. Ke me mwù nyan, ywum ndo' be wě mè tæm lwun bye be ci lè **gól**. Be cinni yì fli me' b'wum. ⁸Ñnywùn be bon mwu wě ye me yib. Myin be bon ñwum wě ye me gbêm. ⁹Be d'wòki yì kimmà' yan lè mè plé wì bye be ci lè ñwum. Mè kweb byan be hwæbli wě mè màtwuà ndo' bye mè nyǎmbàlì be tè' bǎ b'wum ken wì d'wí. Be be twùm le b'òdò. ¹⁰Be cinni mè nyi' lè mè nsem ke nlim wě mè kèblè. Mè nyi' nyan ne bon cinne ñkimmò' nyennzi b'wum vènè' lè nun ke me nywi' shæn nun. ¹¹Mvèn nyan ne be bon kènnzi be mpùn byebbi ndo' ne cinni swu' win jimmi màzwùm. Be be nun lon ke le' me Èbrú nun le Àbàdôn. Be konndì tì nun lon ke le' me kyìn nun le Àpòliôn. Sù jin màzwùm ni le ci-ñkyà' ywum.

¹²Vènè! she zwimbyi! leân. Yì vènè! bì ye tì kònndi zwem.

¹³Cikpu! Mvènnswàb nyè mè mfyuru lwon bæn shon. Mùn ywɔ' ñkwu ndɔ' ye ta leli ñwaì ye ke me ndwè' cì mfe sàtikàè! she bi ke swi' Mvènnswàb. ¹⁴Ñkwu mwum màzwùm be leli lè cikpu! Mvènnswàb nyè mè mfyuru ne be lè bæn ke fya', ye she le: «Sùli mè cikpu! Mvènnswàb nyí bye be kpimma! ke moan dú' ndwun ne be ta lon le Èfratà, wù donnzi bon, be ken.» ¹⁵Li, be donnzi bon. Mè cikpu! Mvènnswàb nyí màzwùm, Mvènnswàb kèà bon kwan se be ye kìn bwum be fyà' ñgyɔ' wan fɔ' nun wu. À kè bon d̀wùm, à kè nywi!, à kè ñgyìn, à kè tì hawà ne bon ye bèn nun.

¹⁶Mè suzèn be kwe ke me nyǎmbàli zwem. Be teân m̀n bon, be be bwum mè miliôn ndu' m̀bi. ¹⁷Ywɔèni fe' mb̀k̀ki ne m̀n yenne mè nyǎmbàli lè bwum be naen bon nyè ke ndèmndem nun. Be be lè mè plè wì ke nywi pànngèa wè win, byindɔ' be tì lo le fyìi, byindɔ' be tì pànngèa wè kyà' kpennè. Mè mwù mè nyǎmbàli màzwùm be wè mè gbèm. Win be bon kwean ke ñwum, kònndi lè kyì. Swum ndɔ' kwan tì ku' wè mveb mpàn. ¹⁸Bwum fyà' ñgyɔ' wan fɔ' ywi ntwi' yi vènè! lè yi. Ywum lè màzwùm yi le win, kyì lè mveb mpàn ye be mè nyǎmbàli kwean ke ñwum. ¹⁹Ntwi' se ñkimmo' me nyǎmbàli hwæn be ke me ñwum nyan, a be tì ku' ke me nyi' zwem. Mè nyi' nyan be wè mè nywun. Be cinni mè mwù, nun ne bon be bwum vènè! yennzi nun.

²⁰Bwum bye nzwonme be ke ñgyɔ' wan, bye nywælâ yi vènè! yi, be donnze kǎn ywum ye bon fœ lè bon ne!. Be donnzi kan ñmwumnzi me swàb, lè yi f̀k̀ki ye bon bwemme lè **g̀l**, yindɔ' lè lòn, yindɔ' lè mè ñwum. Yindɔ' ye bon pa' lè ñgwò', yindɔ' ku' ye bon pa' lè ñgæ!. Ywum màzwùm hwæn li, ye wòli kan ye yenni, shikì ye ywɔ' ku' le!. Ye cinni kan tì ku' mè kwù kèn.

²¹Bwum bye be yi f̀k̀ki yi mwumnzi, be donnze kǎn mè le' mbyibbɔa, nyè le: ñwuka' bwum, mè le' ndàm, ñywika' me nlà! lè ñyibbɔ' nywi!.

Cikpu! Mvènnswàb bon lè mwen d̀wà s̀

10 ¹Ke nyè yi, m̀n yen tì cikpu! Mvènnswàb kimmi ndɔ', à tǎ kyìli ñwaì ye ke d̀eb. Plè ne nun swi ke nywi be bwɔ'. Ñsè! kanndi nun mwu. Fli me' shon be d̀wùm wè nywɔ', mè mkpa' nyan be wè mè mpè win. ²À be lè mwen d̀wà s̀ ndɔ' ke fya' ñwèli. À sate kwù she ji ke dú' ndwun nun, tì lè she m̀', à sati son kyɔ'. ³À kun lè ñkwu kimmi wè gbèm ne ta fàn. Ke nyè ye nun kun li, m̀n ywɔ' mè mbæn hwæbli bon shanmbi, be fyonnzi cikpu' ni. ⁴Be lè m̀n tì yili lè m̀n kɔ' swum se mbæn leli si, son, ñkwu mwum ndɔ' waì ke d̀eb, ye she lè m̀n le: «Ba wù kɔ' swum se mbæn leli si, ba wù cì mwum ndɔ' limmì son.»

⁵Li, cikpu' ne m̀n yenne zwò ñdyimi, kwù she fɔ' ke dú' ndwun nun, she fɔ' ke kyɔ', à wasi fyà' ji zwò, ⁶à l̀' ñd̀' lè jin Mvènnswàb ne d̀yi

̀nzison kwan hwæn, nun ne f̄de d̄eb l̄e ywum ye d̄yi kwe hwæn, nun ne f̄de t̄i nḡyo' l̄e ywum ye d̄yi ke nlim hwæn, k̄onndi l̄e du' ndwun l̄e ywum ye d̄yi kwe hwæn. À sh̄e le: «Jene, kwan wolâ. ⁷Kwan se cikpu' Mvènnswæb nȳe mè nshanmbi ȳe b̄æn shon lwon, Mvènnswæb ȳe mè mwù le' nḡwùmnea nyon lwinnzi w̄e tà she nun sh̄e l̄e mè ci-she byon, bye mè ci-nl̄eli ke nḡwum yon nun.»

⁸Ke nȳe yi, ñkwu mwum ye mùn ywæe mbyí ñwài ye ke d̄eb yi konndi sh̄e be l̄e mùn le: «K̄enne, wù yè mwen d̄ewà s̄ò' nḡwèli ne ke fya' cikpu' Mvènnswæb ne ke zwò ñdyimi, kwù she f̄o' ke du' ndwun nun, she f̄o' ke kyò'.» ⁹Mùn ḡòd' cikpu' Mvènnswæb ni, mùn sh̄e l̄e nun le à f̄i mùn d̄ewà s̄o' si. À fyònnzi l̄e mùn le: «Yè le, wù ji' son nḡwum. Se ye wù be ke nḡwum myimmi w̄e d̄wì', son, kwan se wù ȳe son myí, se ye wù zwùm kwènnzi.» ¹⁰Li, mùn yè d̄ewà s̄o' si ke fya' yon, mùn ji' son nḡwum. Kwan se mùn bi son ji, se bi mùn ke nḡwum myimmi w̄e d̄wì'. Son, kwan se mùn myí son, zwùm d̄unmi mùn kwènni.

¹¹Be kà sh̄e l̄e mùn le: «Ñz̄æ' le' ye Mvènnswæb ȳe wù k̄e nḡwum hwæn, se yili le wù konndi yon k̄en sh̄e. Ñz̄æ' le' yi ye yen mè pa' b̄wum m̄ean, bye cinni mè ñkyin le' nḡwum kyikyí. Ye yen t̄i ku' mè nḡyo' kyikyí, l̄e mè mvèn byan nun hwæn.»

Yì shìtàkwù bì

11 ¹Be fe mùn m̄ò' ndò' fya' w̄e ñtwò' ye be be ywum f̄kea nun. Be kà sh̄e l̄e mùn le: «K̄enne, wù f̄ò' nye Mvènnswæb l̄e cici mfe s̄àtikæ'. Wù tan t̄i ku' b̄wum bye ta Mvènnswæb d̄oa kwe nlim. ²Kwan se wù ȳe f̄ò', ba wù f̄ò' bàbà nye Mvènnswæb she ke wan. Donnzi son, ntwi' se Mvènnswæb k̄e son l̄e b̄wum be ba ñkwìn b̄wum byon. Be ye nzanni ke nlim nsòn sanmi Mvènnswæb nun, a ken b̄èn mè nywi' mwum nyí blàn bì. ³Mùn ȳe yì shìtàkwù bì ȳem fyi kwe, be ye be l̄e mè pl̄e nsh̄i ywi ke nywi. Li, be ye leli ke nḡwum ȳem nun ke me nḡyín ñkæm l̄e ñdu' m̄bi l̄e nḡyìn mwum fyuru nun.»

⁴Yì shìtàkwù bì màzwùm d̄yi ke swi' Nyeli ne cinni ñkimmò' ke nḡyo' zwem hwæn. Be bi w̄e mè ñjì nḡæ' bì bye be ta lon le òl̄ivè. Be be t̄i w̄e mè læm bì. ⁵Beshe mwum ndò' yili nun ci bon byebbi, win ye bon kwean ke nḡwum, a wu mè ci-byinnzi màzwùm. Li ne ywi ȳe mwum ne yili nun ci bon byebbi bænni. ⁶Kwan se yì shìtàkwù màzwùm ta l̄eli ke nḡwum Mvènnswæb nun, be cinni ñkimmò' ntwò' d̄eb l̄e mvu lækì nwi. Be cinni t̄i ñkimmò' ñkwebsi mla', ye fyonn̄i mvæb. Be konndi t̄i ñkimmò' cinni l̄e be yennzi b̄wum mè vènè' kyikyí ke kwan se bon yili nun hwæn.

⁷Kwan se be ye ñdyi shìtàkwù yan ml̄ò' hwæn, nyàm ne ta kwan ke swu' win nun ȳe bon k̄in wì tean. À ȳe bon l̄ean l̄e ñkimmò', à wu bon. ⁸Yì d̄won yan ye nònngà' ke mbyi ndwun ne ke nsòn twun nun. Ñsòn màzwùm yi cici se be ywummæe Nyeli nyan Yesù nun ke nḡæ' mè b̄otò'

zwem. Jin shon she gwùmni si le Sòdôm, a si ti ku' le Èjîb. ⁹Mè ñkwìn ßwum ße cinni yi kwæ' nywi kyikyî, ßye ta mè ñkyìn le' leli kyikyî, ßye wai ke me ñgyo' kyikyî nun, ße ye yi ðwon yi cekea ke ñgyo', a ken wòli ñgyìn lè lè kitò', shìkì ße yili le mwum ndo' ni gwum yon. ¹⁰Ñlim ye lan ñgyô' wan lwukeya kwan se ßwum ßi màzwùm ye ywi, ße ye ñdàli ywo, ße næmnnzi ti ku' ßwùlu mè ðàsi. Ntwi' se ßwum ßi màzwùm hwumnnzâ lan ñgyô' wan ñzwonzwò'. ¹¹Son, mùn yen ke ndèmndem nun le, ke nyè ñgyìn lè lè kitò' yi nun, Mvènnswæb fyòsi ßon mpùn mè yìnni ße, ße wa' ße zwò. Li, ßwum ße yenni, yi ðun ßon ke zwum ñzwonzwò'. ¹²Ke nyè yi, yi shitakwù ßi yi ywo' ñkwu mwum ndo', ye ta leli kimmi ñwaì ye ke ðeb. Ye ta ßon shè le: «Nàènni fe.» Li, ße nan nlim ðeb ke ßwo' nun. Mè ci-ßyinnzi ßyan ße ðyi, lè ße ßon ce. ¹³Ke kwan màzwùm nun ñnywèn, ñgyo' funnzi lè kim, mè nye mèan swinà' ke ñgyo'. Bwum ywi ñkæm shanmbi. Bye fò' ßye ywie kân, yi ðun ßon zwum ñzwonzwò'. Li, ße ðunmi ñtwu fe lè Mvènnswæb nyè ke ðeb.

¹⁴Vènè' nyè mè mbi lèân. Nyè mè nlè ti ti kìn nùn.

Bàen she mè nshanmbi

¹⁵Ke nyè yi, cikpu' Mvènnswæb nyè mè nshanmbi lwon bàen shon. Mùn ywo' mè ñkwu ndo' tã kun ke ðeb kimmi, lè à tã le' le: «Nyeli nye' Mvènnswæb ßon lè **Kristò**, mwum ne nun fyie ke ñgyô' wan, ßon ße cinni ñkimmò' jene lè ße ywo' ñgyô' wan hwæn. ße ye ywo' li kwan hwæn.»

¹⁶Bwumñkæm mwum ßi ðlàn nyí ßye ße ñtònmi ke yi gba' lwun yan zwem ye ße ke swi' Mvènnswæb, ße swinì ke ñgyo', ße wu mè mwù ke ñgyo'. ße ðunmi Mvènnswæb mwumnnzi, ¹⁷lè ße ta le' le:

«Nyeli nye' Mvènnswæb ndwun, wù ne ße mbyí, wù ni kwe jene.
Bwi' ta wu osòkò' yili mbòkì ne wù lisea kim swù,
wù ðunmâ ywo' ke ñgyô' wan.

¹⁸Bwum ßye limmi kan wù nyenâ ñzwonzwò'.

Son, kwan wolâ she wù yè ku' nyeni lè ßon.

Wù yè ti ku' ßwum ywi mè kàè' lannzi.

Kwan wolâ she wù yè ku' mè ci-she ßyù ßye ta leli ke ñwum ywù
nun ðàsi fe.

Wù fe ti ku' lè ñkwìn ßwum ßyù, kwo fe' ße ße ßwesò', kwo fe' ße ße
ßwumñkæm.

Bwum ßye ta wu ywòli hwæn, wù yè ku' ßon ðàsi fe.

Ti lè ßwum ßye ta ñgyô' wan gwànnzi, wù yè ßon ñgyìn mlòsi
ñgyìnmbò'.»

¹⁹Ke nyè yi, mùn yen ße wo ñwum nye Mvènnswæb ke ðeb. Kwitì ne ße lè yì ðlon ye ße kœ pwìn ñgwòn ke nlim ße kwe. Kwan se mùn yenne nun, mbàen ðunmi ñwàtì lè à tã pyì. ñgyo' funnzi, mè lila' konndi swi mèan.

Mlib ne yeàn nyàm nnyeni ke fya'

12 ¹Kikeàn hilea ndo' kwan ke dɛb. Mùn yenne mlib ndo', plè ne nun be swi' ke nywi be nywo', nywi' be nun ke mɛ kwù nji, tàem lwun nɛ be nun ke mwu be mè nywæ' wùm flàn bì. ²Mlib màzwùm be lè zwùm. Ye dúnmi nun kwènni. À dúnmi kwe ntwi' se nywi be nun kwènni.

³Kikeàn hilea shindo' kwan tì ke dɛb. Mùn yenne nyàm ndo' nɛ be mpèan, nyàm màzwùm be wě ñgèà. À cinni mè mwù nshanmbi, lè mè nzwu wùm. 'Be swoen mè tàem lwun ke mɛ mwù nshanmbi ni zwem. ⁴Ti lè ñyi' yon, à be mè nywæ' ghèan lè yon, lè à tà bon swi' ñgyo'. À kìn dyi ke swi' mlib nɛ ye be kwèn ni, bǎ kwan se nun yě ye, nun bæn mwen màzwùm, nun jìd' nun ñwum. ⁵Ke nyě yi, mlib ni ye mwen nɛ ndwɛb, mwen màzwùm nɛ ye mè ñgyo' hwæn ywo lè ñjinnɔ' nun. Son, kwan se nun ye nun, bɛ twe' mwen màzwùm mbyimmi, bɛ ken lè nun ke ke Mvènnswæb nɛ be ke gba' lwun shon zwem ñtònmi. ⁶Ti lè mlib nun nɛ', à yeàn ke kyo' nun, ke cici se Mvènnswæb fɔse nun cí tòn nun, bǎ bɛ dī nun kwe ke ñgyin ñkæm lè ñdu' mbi lè ñgyin mwum fyuru nun.

⁷Twù' ndo' pyi kwe dɛb. Mishél bon lè mè cikpu' bye fɔ' dúnmi twù' dɔwí bon lè nyàm nɛ gwili ñgèà ni. Nyàm ni ku' bon lè mè cikpu' byon dúnmi ku' twù' dɔwí bon lè Mishél. ⁸Mè Mishél lan bon lè ñkimmɔ', bɛ fyinni bon. Li, bɛ donnzi kan tì nyàm ni bon lè mè cikpu' byon pon bǎ byi bi ton ke dɛb. ⁹Be dɔwí nyàm ndwun ni ke ñgyo', nun nɛ dyi pwìn nywun nɛ bɛ ta lon lɛ Satæn, bɛ lon tì nun lɛ m̀vèn mè swæb, nun nɛ ta bɔwum pɔkea ke cě ñgyɔ' wan hwæn. 'Be dɔwí nun ke ñgyo' lè mè cikpu' byon nun hwæn.

¹⁰Ke nyě yi, mùn ywo' mwum ndo' tá leli lè ñkwu kimmi ke dɛb lɛ: «Jene, Mvènnswæb swætá bwi' ñgyinmbɔ'. À lisea kim shon she nun ni m̀vèn, jene bwi' yenná ñkimmɔ' **Kristò**, mwum nɛ nun fyie ñgyɔ' wan. Ntwi' se mwum nɛ be mè ñgyinni bye' wilea kpòn lè nywo' ke swi' Mvènnswæb, bɛ dɔwíá nun ke wan. ¹¹Mè ñgyinni bye' leán nun lè ñkimmɔ', ntwi' mvæb Mwen Nzwumngan Mvènnswæb lè ntwi' lɛnkæm she bon be shè. 'Be yenni ywi, bɛ dúdn ke nlim. ¹²Li nɛ ci, dɛb lè ywum ye dyi kwe hwæn, beèni lè ñdàli. Ti lè byin, ñgyo' lè du' ndwun, byin ti ke vèni' nun ntwi' se Satæn bènná ke cì shin. Nlim ke nun nyeni zwum ñzwɔnzwɔ' ntwi' se nun limmi lɛ kwan nzwonme nun kwæ'.»

¹³Kwan se nyàm ni yen lɛ bɛ dɔwíá nun ke ñgyɔ' wan, à dúnmi mlib nɛ ye mwen nɛ ndwɛb ni dɔwɔn. ¹⁴Kwan se nun dúnmi nun dɔwɔn, bɛ fɛ mlib ni mè kweb bì wě ye m̀byi' ndwun ndo' bǎ nun dī lè yon, à nywæli nyàm ni ke fya', à kèn bèn ke cí tòn shon ke kyo' nun, cici se Mvènnswæb yě nun dī ke yi dɔwùm lé lè kítò' nun. ¹⁵Li, nyàm ni pwibbi mlǎ' ke ñwum yon, ye fyonnì du' bɛ nyě mlib ni, bǎ ye ken nun she. ¹⁶Son, dan ñgyo'

kpa' mlib ni, se sænnɔ, li, mlä' ye nyàm ni pwibbi ye ðunmi ðun ke ɲɲwũm màzwùm nun. ¹⁷Nyàm ni nyeni ñzwɔnzwɔ' lè mlib ni, à fyòn be, à kèn wì kèa lè ðwen byon. 'Bwen màzwùm be ðwum bye ta mè lwuä Mvènnswæb ðwon, be yili tì lenkæm se Yesù be lisà'. ¹⁸Nyàm ni kèn ðyi ke ɲgonni ðu' ndwun zwem.

Mè nyàm ði ndɔ'

13 ¹Li, mùn yen nyàm ndɔ' tã kwain ke ðu' ndwun nun. À cinni mè mwù nshanmɔi lè mè nzwu wùm. 'Be swon mè tæm lwun ke me nzwu màzwùm zwem. 'Be kɔ' tì ku' jin ndɔ' ke me mwù ni zwem, jin màzwùm be jin Mvènnswæb gwànnzi. ²Nyàm màzwùm gwile nyàmmbò', mè kwù byon be wë bye nyàm ndɔ' ne be wë cɪn, ɲwum yon gwili ye gbêm. Nyàm ne be wë ɲgèà ni fè lwikwæn nyàm ni ɲkimmɔ' yon hwæn, à tònɲzi nun ke gba' lwun shon zwem. ³Mwù fɔ' ke nyinnim me mwù nshanmɔi ne nyàm ni cinni nun, ye be wë be kwi yon nun bã nyí ni ywi. Son, mbon màzwùm kimmɔ'. Shimmea ci ðwum be ɲgyɔ' wan hwæn, be ðunmi nyàm ni ðwon nyè. ⁴Mwum hwæn be nyàm ne gwile ɲgèà ni mwumɲzi ntwi' se nun fèe ɲkimmɔ' yon lè lwikwæn nyàm ni. 'Be be tì ku' kònndi nyàm ni mwumɲzi lè be ta le' le: «Yà mwum ne cinni ñtwu, à wòli lè nyàm ni? Wen ne woli kim à ðwi wì lè nun?»

⁵Ti lè nyàm ni, be fe nun mbyi nshela' nywi lè à tã jin Mvènnswæb gwànnzi. 'Be ðonɲzi tì ku' nun lè à cinni ɲkimmɔ' ke ɲgyɔ' wan ke me nywi' mwùm nyí ðlàn ði. ⁶À ðunmi jin Mvènnswæb gwànnzi, lè à tà nun kɔlea, à simmò' tì cè nun tã tòn nun lè ðwum be ðyi kwe ðeb hwæn. ⁷Be fe nun ɲkimmɔ' le à ðwi twù' lè ɲkwìn ðwum Yesù, à làn bon. À cinni ɲkimmɔ' ke nywi ðwum hwæn pæ', bye cinni yì kwæ' nywi kyikyì, bye cinni mè ɲkyìn le' ke ɲwum kyikyì, bye wai ke me ɲgyɔ' kyikyì nun. ⁸Lan ɲgyɔ' wan hwæn ye nun mwumɲzi, sàñ suku' ðwum bye be kɔe mè myin nyan ke ðewä nzison nun kwan se be lè Mvènnswæb fì' kife' ɲgyɔ' wan. 'Dewä màzwùm, she Mwen Nzwumɲgan Mvènnswæb ne be wue se.

⁹Mwum ne cinni mè ywi' nywɔ' le', à nonɲzi bon, à ywɔ' le' se lwen. ¹⁰Mwum ne Mvènnswæb shè le be ye nun bænni, be ye ku' nun bænni li lenkæm. Nyè nun shè le be ye nun wu lè kàfà', be ye ku' nun wu li lenkæm. Ke à si li, se yili le ɲkwìn ðwum Yesù bæñ ñlim, ða kì be ðonɲzi mbyi Mvènnswæb.

¹¹Ke nyè yi, mùn yenne tì nyàm nyè ðin ndɔ' tã kwain ke ɲgyɔ'. Mè nzwu be nun ke mwu ði wë bye ñzwùmɲgan. À be leli wë nyàm ne gwili ɲgèà ni. ¹²À yèe ɲkimmɔ' fya' nyàm nyè zwimbyi' nyè be lè mbon ke mwu, son, mbon ni kimmɔ'. À ðunmi ɲkimmɔ' màzwùm lisea ke swi' shon, lè à tã ðwum ɲgyɔ' wan dòlè' cì bã byi ði mwumɲzi nyàm ni. ¹³Nyàm nyè mè mɔi ni be mè le' ɲgwulea cì. À kwannzi win ɲwai ye ke ðeb, ye kyili ke ɲgyɔ' zwem ke swi' ðwum hwæn. ¹⁴Mvènnswæb ðonɲzi

nun lè à pɔka' lan ngyɔ' wan lè mè le' ngywulea ne nun be ci ke swi' nyàm nyě zwimbyi'. À shè lè bwum le byi bi fɔ' swum ndɔ' se gwili nyàm nyě zwimbyi' nyě be kwi lè kàfà', son, ǎ ywi kan. ¹⁵Nyàm ni kà cinni ñkimmɔ', à fe mpùn mè yinnì lè f̀kì nyàm màzwùm. Li, f̀kì màzwùm ðunmi leli, se wu tì ku' bwum bye yili kan be mwumnzi nun. ¹⁶Nyàm ni kònndi bwum dòlè' cì bǎ byi bi yili be ðæn byi mbù' ke swi', lè tì ke fya'. Kwo fe' mwum be mwumñkàm, kwo fe' nun be mwesò', nun be fe' ci-njòndi, à be fe' ñshi, kwo fe' nun be son, shindɔ' à be lè mwù yon, mbù' màzwùm ye nun be nywi. ¹⁷Mwum wòli kan à hwìn swum ndɔ', shindɔ' à kyì swum ndɔ' shìkì à cinni mbù' màzwùm nywi. Mbù' màzwùm yi jin nyàm ni, à be tì ku' nombà ne lisa' jin màzwùm.

¹⁸Ke cě, a yili bwum cinni kon ke mwu. Mwum ne cinni kon ke mwu, à wòli kim à limmì ywum màzwùm. Ntwi' se nombà màzwùm ni nyě be ta fe lè mwum. Nombà ni ni ñdu' fyuru lè mwùm fyuru blàn fyuru.

Ñkwìn bwum Nzwmunggan ta ñshib ye nywæb shibbi

14 ¹Kwan se be lè mún ke ce fya', mún yen Mwen Nzwmunggan Mvènnswæb ñdyi ke moan kpa' ne be ta lon le **Siôn**. Be be kwe bon lè bwum ñkàm ndu' lè bwum ñkàm mwùm nyí blàn nyí. Bwum màzwùm, be kœ bon jin Mwen Nzwmunggan lè jin Ce nyon ke swi'. ²Li, mún ywɔ' ñkwu mwum ndɔ' be wai ke ðeb, ye ta twùm wě pwðàpwðà, ye konndi hwæbli kimmi wě ñbæn ne ta pyi. ñkwu màzwùm gwili ñshib kwòn mbe' lwen ndɔ' ye mè ci-mbɔ' mbe' ta bɔ'. ³Bwum mēan bi be ðyikea ke swi' gba' lwun Mvènnswæb, kònndi ke swi' ywum nyí ye cinni ñzison yi, lè tì ke swi' bwumñkàm bi. Bwum màzwùm be ñshib nywæb shibbi. Mwum ðin ndɔ' wòli kan kim à yusa' ñshib yi, a shi be bwum ñkàm ndu' lè bwum ñkàm mwùm nyí blàn nyí bi. À bi bwum bye Mvènnswæb libbeá ke ngyɔ' wan.

⁴Bwum màzwùm, be boen kwæ' nywi shan lwen shìkì be cinni lè mè yib. Be ta Mwen Nzwmunggan ðwon ke yi cici hwæn ye nun tǎ kèn nun. Bon be bwum bye Mvènnswæb sete libba' ke nyinnim bwum ngyɔ' wan nun bǎ be be bwum byon, be be tì ku' bye Mwen Nzwmunggan. ⁵Mè mbwě' kwan kife' bon nywɔ' ndɔ' ke ñwum, shìkì mwum ndɔ' cinni ku' swum wèsi ndɔ' ke nywi yan.

Mè ntwum mè cikpu' lè Mvènnswæb

⁶Ke nyě yi, mún yen cikpu' Mvènnswæb ndɔ' tǎ ði ke nlim zwò, à be kìn bǎ nun she bwum ñtwum lwen ndɔ' ye ye tòn ðwùmdwùm. À yě yon shě lè bwum bye wai ngyɔ' wan nun hwæn, bye cinni mè ñkyìn le' ke ñwum kyikyì, bye cinni tí yi kwæ' nywi kyikyì. ⁷À leli lè ñkwu kimmi le: «Yièni Mvènnswæb, byin fe nun ñtwu. Ntwi' se kwan wolá, she nun yě bwum mè kàè lannzi. Mwumzèni nun, ntwi' se nun ne fœ ðeb lè

ngyɔ', à fɔ' tì ðu' ndwun lè mè mwù ðu'.» ⁸Ke kwan màzwùm nun, cikpu' Mvènnswàb nyě mè mbi kwan ke nyě nyě zwimbyi', lè à tã ti ku' le' le: «**Bàbilón** mukeâ! Myi twun màzwùm mukeâ ñgyinmbò! Be kyiileâ byebbi nyan ke nyinnim ðwum ðe ngyɔ' wan hwæn wě ðæ'. Byebbi màzwùm ni ñzæmmi ne bon læmzi ke ngyɔ' wan.»

⁹Cikpu' Mvènnswàb ndo' kwaìn tì, nun màzwùm nyě mè nlè ne be. À ðwonngae bye bí bye seti kwan ke mbyi' bi lè à tã leli lè ñkwu kimmi le: «Mwum ne tã nyæm ne kwan ke mla' nun mwumzi, à mwumzi tì fɔki shon, à cinni tì mbù' yon ke swi', shindo' ke fya', ¹⁰mwum màzwùm yě vènè' nwi ke fya' Mvènnswàb lè nun ne'. Mvènnswàb yě nun nyeni nlim yon lisea ke pisean ke vènè' nyě nun yě nun yenni nun. À yě mwum màzwùm fyasi lè win, à fyasi tì nun lè mveb mpàn. Mwum màzwùm yě vènè' yenni li ke swi' me cikpu' Mvènnswàb lè ke swi' Mwen Nzumngan. ¹¹Kyi win ye ðwum màzwùm ta fya' ke nlim, ye ye nân ke zwò ñgyinmbò'. Pon me yinni ba ðe lè ðwum ðe mwumzâ nyæm lè fɔki shon, ðe cinni tì ku' mbù' jin shon ke nywi yan, ðe ye su' tòn lè vènè' kpòn lè nywo'.»

¹²Li ne ci, ñkwìn ðwum Yesù ðe ta mè lwaã Mvènnswàb mwumzi, ðe ðe tì ywoli lè Yesù, se yili le ðe ðe mè ci-mbæn nlim.

¹³Ke nyě yi, mùn ywo' ñkwu mwum ndo' ta leli lè mùn, ñwai ke ðeb. Ye ta le' le: «Kò' ñzæ' le' ne: Tòn lwen si lè ðwum ðe ta ywi jene ke she Nyeli nye' Yesù nun.» Kwan se ñkwu yi leli li, Mpùn Mvènnswàb fyònnzi le: «Hèn, à si li. Mè she ñkimmò nyan mlâ hwæn, ðe cinnâ mè yinni. Ntwi' se lwen ne bon ci kweân ke pisean.»

Mè cikpu' Mvènnswàb bye ta ywum ðyim linni ke ngyɔ' zwem

¹⁴Be lè mún ke cè fya', mùn yen ðeb mvu pwebbi ndo'. Ke ðeb mvu màzwùm nun, swum ndo' ðe kwe tònmi wě mwum. Mwum màzwùm cinni tæm lwun ne ðe cie lè **gól**. À ðe lè citòn mpwu ke fya'. ¹⁵Cikpu' Mvènnswàb nyě ðin ndo' kwaìn ke nye Mvènnswàb ndwun. À kun lè ñkwu kimmi, à shè lè mwum ne ðe ke ðeb mvu nun ñtònmi le: «Sheli citòn nywù, wù lin ywum ðyim. Ntwi' se kwan nlin ywum ðyim wolâ. ñgyɔ' wan kimmâ, kwan nlin se ti.» ¹⁶Li, mwum ne ðe ke ðeb mvu nun ñtònmi fyisi citòn nyon ke ngyɔ' zwem, à lin ywum hwæn.

¹⁷Ke nyě yi, mùn yen cikpu' Mvènnswàb nyě ðin ndo' kwan tì ke nye Mvènnswàb ndwun ne ke ðeb. Nun ku', à ðe tì lè da' pwu ke fya'.

¹⁸Cikpu' Mvènnswàb nyě ðin ndo' wai tì ke cí mfe sàtikà'. Nun, à ðe konni lè win. À kun nyě ðe lè da' fya' lè ñkwu kimmi, à shè le: «Sheli da' swù, wù kèn mè mwù sea ne ke ngyɔ' zwem ni kwí. Ntwi' se nun pànngéa hwæn.» ¹⁹Cikpu' Mvènnswàb ni fyisi da' shon ke ngyɔ' zwem, à kwì mè mwù sea ni, à kèn nun swí ke wæ', she lisa' nyeni nlim Mvènnswàb lè ðwum byibbò. ²⁰Be ken sea yi sæbbi ke wæ' se ke nyě nshim. Kwan se

be dunmi sea yi sæbbi bǎ be kwannzi mēwu, mvæb ye fyôn kwan. Mvæb màzwùm be kyì wě ðu'. Læb læbbi be mè kilòmetà ndu' nlè. Jim jimmi be metà mbò' lè kītò'.

Mè cikpu' Mvènnswæb bye ben lè mè vènè' nyě ìmmlòkà'

15 ¹Ke nyě yi, mùn yenne le' ñgwuli ndò' ke ðeb. Se cie mùn shimmea ñzwònzwò'. Mè cikpu' Mvènnswæb be kìn bon shanmbì, kwo wen lè vènè' fya' fò'. Mè vènè' nyě ìmmlòkà' ne ye be, ntwi' se ke me vènè' màzwùm nun ne Mvènnswæb yě nyeni nlim yon mlàa nun.

²Ke nyě yi, mùn yen swum ndò' wě ðu' ndwun ndò'. Swum màzwùm be ðwùmna' wě ðænnglæ' lè win nun fyinnɔa. Mùn yen tì bwum bye leân nyàm ni lè wì, be lan tì ku' fòkì shon lè nombà nyě lisa' jin shon. Be be ðyikea ke moan ðu' ndwun ne be wě ðænnglæ' ni, be cinne mè mbè' bye Mvènnswæb fæe bon ke fya'. ³Be be ñshib Mòizè, ci-she Mvènnswæb shibbi, be shib tì ku' ñshib Mwen Nzwumngan. Be be shib le:

«Nyeli nye' Mvènnswæb ne lan ywum hwæn lè ñkimmò'.

Mè she nywù ni ñglwòkea, à be tì ñlwukea.

Wù ni ìvèn ne kě yì ywò' ye cě ñgyò' zwem hwæn.

Mè mwù le' ne wù tǎ kèkà' ni ke mbyi nun, à be tì ñlwinni.

⁴Nyeli, mwum ne wòli kan kim à yi wù ni wen?

Mwum ne wòli à shè le nun ni bà wù ñtwu fe ni wen?

Wù ne suku' mwum nsanmi, wù kyiswù.

Bwum bye wai ke ñgyò' wan nun hwæn ye kìn swummi ke swi' swù bǎ be mwumnsi wù.

Ntwi' se bwum hwæn yennà le ywum ye wù tǎ cì yi lwinni.»

⁵Ke nyě yi, mùn yen tì be le ñwum nye Mvènnswæb ke ðeb yi lwon, mùn yen ðwun se bwum Izràèl kee ywum ye bon jine ñgwòn nun lè Mvènnswæb.

⁶Mè cikpu' Mvènnswæb shanmbì bye be lè mè vènè' ke fya' shanmbì bi kwaìn ke nye Mvènnswæb ni nun. Be be lè mè plé pwibbɔa bye ta ðwùmna' nùn ke nywi. Mè ñkændan ne be cie lè **gól** be bon ke me ñkwù' ñkpinmea. ⁷Swum fò' ke nyinnim ywum nyí ye cinni ñzison yi nun fe mè cikpu' shanmbì bi mè kwêb bye be cie lè **gól** ke me fyà' mbò'-mbò'. Mè kwêb màzwùm be lwinnɔa lè nyeni nlim Mvènnswæb, nun ne ðyi ñzison kwan hwæn. ⁸Ñtwu Mvènnswæb lè ñkimmò' yon be kyì win ndò' kwannzi kwe, ye lwìn nye Mvènnswæb hwæn. Mwum ndò' wòli kan kim à ðun kwe, han a ken wòli ke kwan se mè vènè' nshanmbì ne mè cikpu' Mvènnswæb benne lè nun ni yě mlò'.

Mè kwêb shanmbì bye lisa' nyeni nlim Mvènnswæb

16 ¹Ke nyě yi, mùn ywæe ñkwu mwum ndò' ta leli kimmi ñwai ye ke nye Mvènnswæb ndwun, ye ta leli lè mè cikpu' Mvènnswæb shanmbì bi, ye she lè bon le: «Kènnèni, byin kpità' mè kwêb shanmbì be cinni nyeni nlim Mvènnswæb ke nlim bi ñgyò'!»

²Cikpu' Mvènnswæb nyě zwimbyi' wa' kèn, à kèn kwêb nyon kpiti ke ŋgyɔ'. Ke mkpiti ye nun kpiti li, ßwum bye be lè mbù' nyæm ni ke nywi, be mwumzi tì ku' f̀k̀i shon, yì fon lù bon nywi hwæn, be suku' tòn lè vènè'.

³Cikpu' Mvènnswæb nyě mè m̀bi kèn kwêb nyon kpiti ke ðu' ndwun nun. Mlǎ' yì fyonnì wě mvæb ye ta kwan ke nywi ðwon. Li, ywum ye ta tòn kwe ðu' nun ywi hwæn.

⁴Cikpu' Mvènnswæb nyě mè nlè kèn kwêb nyon kpiti ke ðu' nun lè ke me mwù ðu'. Mlǎ' fyonnì tì ku' mvæb. ⁵Mùn ywɔ' cikpu' Mvènnswæb nyě cinni ñkimmɔ' lè mlǎ' tǎ leli le: «Ce nsanmi, wù ne be mbyí, wù ni tì kwe jene, wù linnâ mè kàè' wě tà she se yili. ⁶ßwum ŋgyɔ' wan wuâ ñkwìn ßwum byû, be wu tì ku' mè ci-nleli ke ŋwum ywù nun. Jene, wù cià be nwi mvæb. Li ne se yili ku' le wù ci lè bon.»

⁷Ke nyě yì, mùn ywɔ' ñkwu mwum ndɔ' ta leli ke cí mfe sàtikàè', lè ye ta shè le: «Á si li, Nyeli nyè' M̀vènnswæb ne lǎn ywum hwæn lè ñkimmɔ', yì kyitǎè' ywù yì ke mbyi nun. Ye be tì ye leŋkǎm.»

⁸Cikpu' Mvènnswæb nyě mè nnyì wa' lǎn yon, à kèn kwêb nyon kpiti ke zæ' nywɔ' nun. Li, nywɔ' cinni ñkimmɔ' mfyasi ßwum lè twènnɔ' shon.

⁹Kwan se nun fyasi bon lè twènnɔ' shon li, be ðunmi jin Mvènnswæb gwànnzi. Ntwi' se M̀vènnswæb ne ta mè vènè' màzwùm fyì. Li, be kwebsi kan pa' tòn shan shikì be fe ku' ñtwu lè M̀vènnswæb.

¹⁰Cikpu' Mvènnswæb nyě mè nshæn kèn ku' kwêb nyon kpiti ke gba' lwun nyæm zwimbyi' ni zwem. Njimmi pyì ke ywɔ' shon nun le bitu'. ßwum be vènè' nwi kwe lè zwi' nun. ¹¹Kwo fe' li, be kwebsi kan pa' tòn shan. Son, be be fyön jin Mvènnswæb gwànnzi ntwi' vènè' ne bon be yen, lè yì fon ye be bon woon.

¹²Cikpu' Mvènnswæb nyě mè mfyuru wa' ku', à kèn kwêb nyon kpiti ke ðu' ne be be lon le Èfratà. Du' màzwùm swemnda' bǎ mè mvèn bye wai ke ßwùm-nywɔ' cinni mbyi, be shè ŋgyɔ' cí wummi.

¹³Ke nyě yì, mùn yen mè mpùn m̀byibbɔa nun ñlè. Mè mpùn màzwùm be wě mè glwɔ'. Ye fɔ' be kwaìn ke ŋwum nyæm nyě gwili ñgèà, ye fɔ' kwaìn ke ŋwum nyæm zwimbyi' ni, ye fɔ' tì ku' kwaìn ke ŋwum ci-ntwum me mbwè'. ¹⁴Mè mpùn nlè ni be mè mpùn mè swæb ne tǎ ywum ŋgwulea cí. Be wa', be ken ke cí me mvèn bye ke ŋgyɔ' zwem hwæn, bǎ bon swɔsi byi lè byi bi kiìn wì ðwí lè M̀vènnswæb ne lǎn ywum hwæn lè ñkimmɔ'. Be ye wì ðwí lè nun ke ŋgyìn ndwun ne nun yě mè kàè' lǎnnzi ke ŋgyɔ' wan nun.

¹⁵Nyeli nyè' Yesù tǎ le' le: «Konnèni, mùn yě bèn wě ci-nywi' shikì mwum ndɔ' limmì. Tòn lwèn ye be lè mwum ne yě tòn lè me', ǎ nywàè' kan mè plè byon ke nywi. Li, kwan se mùn yě bèn, à bǎ kènni nywi pwìn, shikì kwènnjin bæn nun ke swi' ßwum.»

¹⁶Mè mpùn nlè ni kèn mè mvèn bi swɔsi ke cìcì ndɔ' se be ta lon ke le' me Èbrù nun le Àmàgèdôn.

¹⁷Ke kwan màzwùm nun cikpu' Mvènnswæb nyě mè nshanmbi kpiti kwêb nyon mè nzännzàn. Ìjkwu mwum ndo' dunmi leli ke nye Mvènnswæb, ìwài ye ke gba' lwun zwem, lè ye ta shè le: «Mê le' hwæn mlââ.» ¹⁸Ke fya' zwem ñnywèn, mbàen ñwàti, à pyi, ñgyo' fun lè kim. Ñdikà' ne Mvènnswæb fde mwum, ßwum yen kife' pa' mfunnzi ñgyo' màzwùm. Ye be kyibli ñzwönzwò'. ¹⁹Myi twun ßwumndeâ ke nyinnim cici lè, mè myi bye ke ñgyo' zwem swinà' hwæn. Mvènnswæb donnzi kan myi twun ndo' ye be lon le **Bàbilón**. Ke nyeni nlim yon nun, à yennzi bon vèné'. A be wě nun be bon swum byebbi ndo' nwisí. ²⁰Yi kpo ñgyo' ye linni ke nyinnim dú' ßwuka', be yen kan tí mè kpa'. ²¹Mê lila' klwokea be swi ñwài ye ke dëb, lè ye ßwum pyitea ke nywi. Lila' fò' cinni ñkyibli fò' bon lè bæm káfê. Bwum be jin Mvènnswæb gwànnzi ntwi' se be vèné' yenni ñzwönzwò' ke me lila' bi ñji. Vèné' màzwùm be kimmi ñzwönzwò'.

Myi ye be twe' mbòki lè ñsibo'

17 ¹Ke nyě yi, mùn yen cikpu' Mvènnswæb ne be ke nyinnim bye shanmbi nun, bye be lè mè kwêb ke me fya'. À kìn mùn shé le: «Klîn, mùn lisà' wù mbòki ne Mvènnswæb yě ñkàn sibo' vèné' yennzi. Ñsibo' màzwùm ni myi ye be gwe ke moan me dú' mèan. ²Mê mvèn bye ke cě ñgyo' zwem be hwæn tòn lè nun, lan ñgyo' wan be tí bæ' sibo' shon ywi.»

³Ke kwan màzwùm nun, Mpùn Mvènnswæb kìn mùn bènni ke nywi. Li, cikpu' Mvènnswæb twe' mùn, à kèn lè mùn ke nlim kyo'. Kwan se mùn bèn kwe, mùn yen ñlib ndo' ni ñtònmi ke nyàm pèan ndo' zwem. Nyàm màzwùm be lè mè myin nsimmó' Mvènnswæb ke nywi ñlèmmi. À cinni tí mè mwù nshanmbi lè mè nzwu wùm. ⁴Ti lè ñlib nun ne', à be lè mè plé pànngéa ke nywi. À físi nywi yon lè ywum nyànngá' ye be cie lè **gól**, be ci tí ku' lè ñgwó' lòn mèan. À be lè kwêb ne be cie lè **gól** ke fya'. Ke kwêb màzwùm nun, mè le' mbyibbóa be ke nlim ñlwinni. Se lisa' le ywum màzwùm wa' ke sibo' se nun be ci nun. ⁵Be kœ nun jin ndo' ke swi', ßwum be kán sù jin màzwùm ywoti. Swum se be kœ, a be le: «**Bàbilón**, myi twun, mon mè sibo', ye be tí ku' mon mè le' mbyibbóa ke cě ñgyo' zwem.» ⁶Mùn yen ñlib ni tá mvæb ñkwìn ßwum Yesù ywi wě ñkan. Bwum Yesù bi, be wue bon ntwi' se bon be shitàkwù Yesù dyi. Ke nyen ye mùn yenne nun, shìmméa ci mùn. ⁷Cikpu' Mvènnswæb ni kà shé lè mùn le: «Yen se shìmméa ta wu ci nun? Mùn yě wù le' mlib ni sannzi lè ñdù' nun, lè le' nyàm ne nun nàn ke nyè, nyě cinni mè mwù nshanmbi lè mè nzwu wùm. ⁸Nyàm ne wù yenni ni bi lè ñzison, son jene, à bà tí ñzison. Kwan nzwonme kwæ', à yě ñzison cinni tí be, à kwain ke swu' jimmi nun. Son, Mvènnswæb yě nun wui ñgyinmbo'. Lan ñgyo' wan bye be kò' kan mè myin nyan ke dèwá nzison nun ñdiká' ndunmi ñgyo' wan, be ye shìmmà' kwan se bon ye nyàm ni yenni. Nyàm ne be mbyí lè ñzison, jene, à bà tí ñzison, son, à kà kwankà' tí.

⁹«Ke cě, à yili le bwum cinni kon ke mwu. Mè mwù nshanmbì ni lisa' mè kpa' shanmbì ye mlib ni tă tòn ke zwem. À lisa' tì ku' mè mvèn shanmbì. ¹⁰Kì-shæn ke nyinnim shan nun nyæbbâ. Nyě mè mfyuru tă lwun sea jene, ti lè nyě mè nshanmbì, ă bèn kife'. Kwan se nun màzwùm yě bèn, à bǎ nõn kwan læbbi. ¹¹Nyæm nyě be mbyí lè ñzison, son jene, à bǎ tí lè ñzison, à ni mvèn nyě mè nini ni. À ni ke nyinnim me mvèn shanmbì bi nun, son, kwan se nun yě tì lwun nõn be, Mvènnswæb yě nun wu ñgyìnmbò'. ¹²Mè nzwu wùm bye wù yenni bi bi mè mvèn wùm bye nõn kife' lwun. Be ye ñkimmò' nsa' lwun yě fya' nyæm ni bǎ bon sa' bon lè nun, son, a ba mgbænni. ¹³Mè mvèn wùm hwæn cinni ñwum le' fò'. Ñwum le' màzwùm yi le, bon ye ñkimmò' yan fe hwæn ke she nyæm nun, bǎ nun ken mbyí lè ywò' shon. ¹⁴Be ye wì dǔwí lè Mwen Nzwumngan Mvènnswæb. Son, Mwen Nzwumngan yě bon læan lè kim, ntwi' se nun ni Nyeli ne læn bwùlu mè nyeli, à be tì Mvèn ne læn bwùlu mè mvèn. Bwum byon ye dǔyi ke nyè nyon, be lan wì lè nun mban. Bwum màzwùm bi bwum ywòli bye nun yæn, à lon tì bon le byi bi be bwum byon.»

¹⁵Cikpu' Mvènnswæb ni kònddi tì mùn shě le: «Mè dǔ' bye wù yenni ñsibò' ni ni ke moan ñtònmi bi, be lisa' mè ñkwìn bwum bye cinni yi kwæ' nywi kyikyí, bye wai ke me ñgyò' kyikyí nun, bye cinni mè le' ke ñwum kyikyí. ¹⁶Ti lè mè nzwu wùm bye wù yenni bi, lè nyæm nun ne' nun, be ye ñsibò' ni byinnzi. Ywum ye nun fya', be ye yon fyõn hwæn, be donnzi nun be nywi pwìn. Be ye nun jìð' ñwum. Làn m̀bò' ne yě nzwon, be fyasi nun ke win. ¹⁷Mvènnswæb ne ci mè mvèn wùm bi pyi ñwum fò', be ci she she nyæm, bǎ ywò' shon ken mbyí. Nyili Mvènnswæb be ku' li, han a ken bèn kwan se ñzǎ' le' yon ye lwinni hwæn.

¹⁸«Ti lè mlib ne wù yenni ni, myi twun ye cinni ñkimmò' ke nywi me mvèn ñgyò' wan hwæn ye.»

Vènè' she Mvènnswæb yě Babilón yenni

18 ¹Ke nyě yi, mùn yen cikpu' Mvènnswæb ndò' tă kyìli ñwai ye ke deb. À cinni ñkimmò' ñzwõnzwò', li, ñwanni shon lú ñgyò' wan hwæn. ²À kun lè ñkwu kimmi, à shè le: «**Babilón** mukeâ, myi twun màzwùm pyiâ mvùmmi. Ye ti jene cí tòn me swæb, ye be tì ku' cí tòn me mpùn mbyibbõa. Mè kyè bye ta bwum yi kwènni ta tòn kwe. ³Lan myi màzwùm læmnzâ byebbi ke nyinnim bwum be ñgyò' wan nun wě bǎ' se be ta kyìlǎ'. Byebbi màzwùm ni ñzæmmi ne be læmnzi ke ñgyò' wan. Mè mvèn bye ke cě ñgyò' wan be hwæn kènni cí shon, mè ci-ñkyì sem yæki ñjõnddi cinni mbyí ke ywum lwukea ye lan myi màzwùm be tæm nun.»

⁴Kwan se cikpu' Mvènnswæb lele li, mùn kònddi tì ñkwu mwum ndò' ywo ñwai ye ke deb, lè ye ta le' le: «Ñkwìn bwum byêm, kesèni nywi lè myi màzwùm, lè byin lækì byebbi cí wě bon, lè byin lækì tì ku' vènè' yenni wě bon. ⁵Ntwi' se byebbi myi màzwùm twilá wě kpa', à kèn bèn ke

deb. Li, Mvènnswæb ɓã bon byebbi màzwùm donnzi. ⁶Yennzèni myi yi vènè! wě tà she ɓwum byon ɓwùlu vènè! yennzi. Byebbi ne bon ciâ, byin fyosì bon nun ɓe, a lan li. Beshe ɓe fe byin pla' swum nwi mbo', feèni bon nyě lãn nun màzwùm lè kim kimmi. ⁷Mbòki ne bon ɓe bon ne' ñtwu fe, ɓe gwannzi lòn ke ywum nyàngga' nun, mbanmbo' ku', yennzèni bon vènè!, byin swi bon ñdwèn nywi. Ntwi' se lan myi màzwùm ta leli ke me nlim nyan nun le: "Myi ye' yi wě mvèn mlib. À tã nòn, shìkì à yen vènè! wě ñkweb mlib. Swum ndo' ɓa ɓwi' cì." ⁸Ke mbàkà' ye bon ta ɓàkà' li yi nun, mè vènè! yě bon cinni nywò' mbo'. Mè vènè! màzwùm ni le: ñgwèngwèn, lè le' ywi, kònnɗi lè ñjè. Win ye myi twun màzwùm ɓusi, ntwi' se Nyeli nye! Mvènnswæb cinni ñkimmò', nun ne lannzi bon mè kàè!»

⁹Mè mvèn bye cě ñgyò' wan bye ɓe ñzæmmi cì ke myi màzwùm nun, kwan se bon ye kyi win ye ta myi màzwùm twènni yenni, ɓe ye kwe ñzwanzwò', lè ɓe ta fyongga'. ¹⁰Be ye ɗyiò' làbbi ntwi' yi ta bon kwènni lè vènè! se lan myi màzwùm ye yen. Li, ɓe ye leli le: «Oyì! Oyì! **Bàbilôn**, myi twun ye cinne ñkimmò', kwan làb kan, kyitæ' ɓænnâ tì ku' wù nùn?» ¹¹Mè ci-ñkyì sem ye ku' ce, ɓe ye kwe, lè ɓe ta nywi ywætea, ntwi' se ɓwum ɓe ye bon ywum sem yan hwinni fya' ɓa tì ɓe. ¹²Ywum sem màzwùm yi le: **gól**, mè ñgwò' ye ta ɗwùmnà' nùn, mè plè lwukea kyikyì ye ta ɓwum me' she mwu. Ywum ye bon ɓe tì ku' kyì ɓe le: ñgæ' nyě ɓe ɓe kæb shě, ywum ye ɓe cie lè mè myi mblæn, ɓe pa' tì yindò' lè ñgæ' ñkimmòɗa, ɓe sa' tì yindò' lè ñwum, kònnɗi lè ñgwò' ndo' ne ɓe ta lon le màblè. ¹³Bwum màzwùm ɓe tì ku' kònnɗi ywum me nwùm lwen kyì mèan, kònnɗi lè man ñgæ' ndo' ye ɓe tì nwùmnà' lwen. 'Be kyì tì ɓà', mèwu, wò' lè gwè nun, mè nà' lè mè pò' nun, mè nyæmbàli, kònnɗi lè mè màtuwà bye mè nyæmbàli ta tèt'. 'Be ɓe tì ɓwum kyì, ɓe fyosì bon mè son. ¹⁴Li, ɓe ye le' lè myi màzwùm le: «Ywum lwukea ye byin ɓe swunni, ye ɓwuâ byin fya! Ñjònnɗi lè ywum nyàngga' yin gweân, byin ɓa tì yon cinni ɓe.» ¹⁵Mè ci-ñkyì sem bye cinni ñjònnɗi ke kwe myi màzwùm nun, ɓe ye ɗyiò' ɓe làbbi ntwi' se yi ta bon kwènni lè vènè! se lan myi màzwùm ye yen. 'Be ye kwe, ɓe ywæta' bon ne', ¹⁶lè ɓe ta le' le: «Oyì! Oyì! Yă pa' vènè! se she cinni myi twun se. 'Bwum byon swie mè plè lwukea ndo' ke nywi, mè plè màzwùm ɓe pànggea, ɓe ɓe tì nywi fõsea lè ywum nyàngga' ye ɓe cie lè **gól**, ɓe ci tì lè ñgwò' lòn mèan. ¹⁷Son, kwan làb kan, ɓe ɓwuli ñjònnɗi màzwùm.»

Mè gea-cì!, lè ɓwum ɓe ɓe ke ci' yan nun, kònnɗi lè mè ci-she ke ci' nun, lè ɓwum bye ta se cinni ke she mla' nun, bon hwæn li, ɓe ɗyiò' làbbi. ¹⁸Ke nyen ye ɓe yen kyi win ye ta myi màzwùm twènni, ɓe ta kun le: «'Bwi' yen kife' myi ndo' mbyì wě myi twun ye.» ¹⁹Li, ɓe ye kwe, ɓe hwen kwùb, ɓe swi ke mwu, ɓe ta bon ne' ywætea, lè ɓe ta le' le: «Oyì! Yă pa' vènè! se she cinni myi twun se! 'Be lè ye ciâ ɓwum bye cinni mè cì' klwòkea ke ɗu' tì mè ci-ñjònnɗi, son, kwan làb kan, ywum màzwùm ɓwu nun fya' hwæn.»

²⁰Byin bye ke dɛb, ywɔɛni ndàli lè mmùkà' ye Mvènnswàb mùkèá myi màzwùm. Byin, bwum Yesù, dàlèni. Byin, mè ci-ntwum Yesù, kònddi lè byin, mè ci-nlèli ke ɣwum Mvènnswàb nun, dàlèni, ntwi' se Mvènnswàb lànnzà bwum myi màzwùm mè kà' ke nywi byebbi ne bon be byin cí.

²¹Ke nyě yi, mùn yen cikpu' Mvènnswàb ɣkimmì ndɔ', à sheli ɣgwɔ' ndɔ' ne be ɣkyibli wě li wɔ', à dɔwì' nun ke du' nun, lè à tã le' le: «Le ne be ye **Bàbilón** dɔwì ke ɣgyɔ' lè ɣkimmì', li, be ba tí yon yenni be. ²²Ke nlim nsɔn twun yi, be ba tí kwòn mbe' ywo, se ta hwæbli, kwo fe' mè ɣkwu mè ci-nshib, be ba tí ye nyě mbɔ' ti ku' mbɔ' ywo, shìkì be ywɔ' ku' ñlwon làgyitæ' bon lè ye bæ̀n. Kwo fe' ci-she mbɔ', be ba tí cinni, shìkì be ywɔ' ku' ɣhwæbli ɣgwɔ' wɔ'. ²³Be ba tí ɣwannì win yenni kwe, shìkì be ywɔ' ñlèli ndweb dæm bon lè mlib dæm. Mè ci-ɣkyì sem byon be bwum klwɔkea bye lan bwùlu ke ɣgyɔ' zwem. Bwum byon ndɔ' be tí ku' bwum hwæn pɔkea lè ñcìkà' me mvili byibbɔa.» ²⁴Li, be yenni **Bàbilón** vè̀nè', ntwi' se ke myi màzwùm nun, be cinne bwum bye wue mè ci-nlèli ke ɣwum Mvènnswàb nun, lè bye wue bwum Yesù. Bwum bye be wue ke ɣgyɔ' wan nun hwæn, mè ci-ɣwu byan bi kwe.

19 ¹Ke nyě yi, mùn ywɔ' wě mbætè bwum mèan ndɔ' ne ta twùmmì ke dɛb, lè à tã le' le: «Alèluyà! Mvènnswàb nye' swætá bwi', à cinni ñtwu, à cinni tí ɣkimmì'. ²Yì kyitæ' yon ye nun tã lin yi ke mbyi nun, ye be tí ye leɣkæm. À linná kyitæ' nsìbɔ' ni ne be bwum mwù gwànnzi lè ñzæmmì nyon. À wìnná ñjì mè ci-she byon bye be wue kwe.» ³Mbætè bwum màzwùm kònddi shè be le: «Alèluyà, kyì win ye ta myi màzwùm twènni ye su' nân li, ye ba mlá.» ⁴Ke kwan màzwùm nun, bwumɣkæm mwum bì blàn nyí, lè ywum nyí ye cinni ñzison kiin swummi ke swi' Mvènnswàb, be mwumnnzi nun, nun ne ke gba' lwun zwem ñtònmi. Be kà le' le: «Alèluyà, **Àmèn**.»

ɣgwìn Mwen Nzwumɣgan Mvènnswàb

⁵ɣkwu mwum ndɔ' wai ke moan gba' lwun, ye ta le' le: «Byin, mè ci-she Mvènnswàb, fèeni ñtwu lè Mvènnswàb nye'. Twulèni nun, lè byin be ta nun yi, kwo fe' bwumɣkæm, kwo fe' bwesɔ'.» ⁶Kwan se nun leli li, mùn ywɔ' wě mbætè bwum mèan ndɔ' ne tã twùmmì wě pwɔ̀pɔ̀wɔ̀, à kònddi hwæbli wě mbæn, lè à tã le' le: «Alèluyà, Nyeli nye' Mvènnswàb ne lán ywum hwæn lè ɣkimmì' tã lwun sea. ⁷Bwi' dalèni, bwi' bèeni lè ñlwuka' nlim, bwi' kònddi tí nun ñtwu fe. Ntwi' ɣgwìn ne Mwen Nzwumɣgan yě dæm she wòlá. Mmyon tã kin. ⁸Be fèa mmyon plè nlwen ndɔ', à tã dɔ̀wùm̀nà' nùn.» (Plè nlwen màzwùm lisa' mè she nlwukea ne bwum Yesù be cì.)

⁹Cikpu' Mvènnswàb ndɔ' kà shě lè mùn le: «Kɔ' ke dè̀wà nun le tòn lwun si lè bwum bye be loin le byi bi kiin ndàli dæm cí.» Cikpu' ni kònddi tí le' le: «Seansean ñzæ' le' Mvènnswàb yi ye.» ¹⁰Kwan se mùn ywɔ' li,

mùn swìtì nun me kwù bã mùn mwumnzì nun, son, ă kà shě lè mun le: «Ba wù cì li. Mùn ni ku' ci-she wě wù, mùn kòndi bē wě mè ɣgyinni byù bye yilá lɛɣkàm she Yesù be fon lisea. Son, mwumnzì Mvènnswàb.»

Lɛɣkàm sɛ Yesù be lisa' si, son sɛ ɖyi mwù nleli me ci-nleli ke ɣwum Mvènnswàb nun.

Mwum ne nà̀n ke nyàm̀bà̀li mpwɛbbi zwem

¹¹Ke nyě yi, ɖɛb weli, mùn yen nyàm̀bà̀li mpwɛbbi ndɔ' kwainmè. Jin mwum ne nèan nun ke nyè be le Mwum-zu'. 'Bɛ be tì ku' nun lon le Ci-lɛɣkàm. À tǎ wì ɖwì ke nlimmì nun, à lin tì ku' kyitǎ' ke mbyi nun. ¹²Mɛ' yi nun ke mwu wě mè mpè win. À cinni ti mè tǎm lwun ke mwu mèan. 'Bɛ kɔ' nun jin ndɔ' ke nywi she mwum ndɔ' limmi kan, shi ku' bɛ nun nɛ'. ¹³Plè nɛ nun swiè ke nywi be mvàb seansean. Jin shon be le Le' Mvènnswàb. ¹⁴Mè ɣkwìn me suzà̀n nɛ ke ɖɛb be nun ɖwon ke nyè. 'Bon hwæn, bɛ be ke me nyàm̀bà̀li pwibbɔa zwem, bɛ be tì lè mè plè lwukea ke nywi bye be pwibbɔa, lè be ta ɖwum me' she mwu. ¹⁵Kàfǎ' pɛw be mwum ni kwean ke ɣwum, son sɛ nun yě ɖwum bye ɣgyɔ' wan lèan nun. À yě bon ywo lè ñjìndi nun. À yě ɖwum nywòtea lè mè kwù wě tǎ she bɛ ta sea sàbbi ke wǎ' bã bɛ kwannzi mèwu. Ke nci ye nun yě cì li, à lisa' le Mvènnswàb nyenà ñzwɔ̀nzwɔ̀' lè ɖwum màzwùm. ¹⁶Jin sɛ bɛ kɔ' ke plè nun lè ke mkpa' yon, à si le Mvèn nɛ lǎn ɖwùlu mè mvèn, lè Nyeli nɛ lǎn ɖwùlu mè nyeli.

¹⁷Ke nyě yi, mùn yen cikpu' Mvènnswàb ndɔ' ni ke zǎ' nywɔ' nun ñɖyi. À kun lè ɣkwu kimmi, lè à tǎ le' lè mè kyè bye ta ɖi zwò le: «Kìènni, byin swɔli ke cìcì sɛ Mvènnswàb kèà byin ji ndwun. ¹⁸Ke kwe byin ye nwɔ' swibbɔa. Nwɔ' màzwùm yi ye me mvèn, ye me ci-zwi' me suzà̀n, lè mè suzà̀n bon nɛ', ye bɛ tì ye me nyàm̀bà̀li, lè ɖwum bye ta bon nèan nyè. Ye bɛ tì ye me son lè ye ɖwum bye bɛ lè mè mwù nyan, ye ɖwesɔ' lè ye ɖwumɣkàm nun hwæn. 'Byin ye nwɔ' ɖwum hwæn pǎ' ji.»

¹⁹Kwan sɛ nun leli li, mùn yen nyàm zwimbyi' ni, mùn yen tì mè mvèn bye ɣgyɔ' wan, lè mè ci-ndwì wì byan. 'Bɛ swɔlǎ ke cìcì ɖɔ' lè bon ɖwi wì lè mwum nyě tǎ nà̀n ke nyàm̀bà̀li zwem bon lè mè ci-wì byon. ²⁰Son, bɛ bæn nyàm ni, bɛ bæn tì ci-ntwum me mbwè' nɛ be ywum ɣgwulea cì ke swi' shon. Ke ywum ɣgwulea ye nun bɛ cì yi nun, à pɔka' ɖwum bye be lè mbù' nyàm ni ke nywi yan, bɛ mwumnzì tì ku' fǔki shon. Li, bɛ bæn nyàm ni bon lè ci-ntwum me mbwè' ni nun, bɛ ɖwiɔ' bon ke swu' win nun lè me'. Cìcì màzwùm, mveb mpàn be nyà̀nni kwe. ²¹'Bwum bye nzwoen, bɛ wue bon lè kàfǎ' sɛ bɛ kwan ke ɣwum ci-nà̀n nyàm̀bà̀li. Li, mè kyè kiin bon nɛ' ɖí lè nwɔ' ɖwum màzwùm.

Yì ɖwùm ɣkàm

20 ¹Ke nyě yi, mùn yen cikpu' Mvènnswàb ndɔ' tǎ kyilì ɣwài ye ke ɖɛb. À bɛ lè kyí ndɔ' ke fya' mbà̀nni. Kyí màzwùm nɛ bɛ ta

mbyi ne kènme ke swu' win nun wõ lè nun. À be tì lè ñdu' ñwum kyibli ndo' ke fya' bænni tí. ²À bën, à bænn nyàm ne gwili ñgèà ni, nun ne dyi pwìn nywun, se lisa' le Satèn, à be tì m̀vèn mè swæb. Cikpu' ni kpæm nun lè ñdu' ñwum màzwùm bã nun ton m̀kpimmea ke yi d̀wùm ñkæm nun. ³Li, cikpu' M̀vènnswæb ni d̀wìd̀' nun ke swu' win nun, à twò' be lè kyí, à kpimma' tì ñwum swu', bã nyàm ni làkì b̀wum ñgyò' wan b̀wuli tì han a kèn wòli ke kwan se d̀wùm ñkæm yi kà lànkà'. Ke nyé yi, be ye nun donnzi bã nun ton kpem kwæ'.

⁴Kwan se be lè m̀n ke ce fya', m̀n yen yì gba' lwun ndo'. B̀wum be be zwem tònmi, be fe bon ñkimmò' lè bon lannzi b̀wum mè kà'. M̀n yen tì mè mpùn b̀wum be be kwie ke ñgyò' wan ntwi' se be be leñkæm se Yesù lisea shě, be she tì le' M̀vènnswæb. B̀wum màzwùm mwumnzi kan nyàm, shikì be mwumnzi ku' f̀kì shon. 'Be cinni kan m̀bù' nyàm ni ke swi', shikì à be ku' bon ke fya'. 'Be yimni ywi be, be d̀unmi sa' lè Yesù Kristò m̀ban a kèn wòli d̀wùm ñkæm. ⁵Mè yimni ywi ye zwimbyi' ye yì. (Tì lè b̀wum ywi bye fò', be yimni kan ywi han yì d̀wùm ñkæm yi lan.) ⁶Tòn lwen si lè b̀wum bye yimnà kèmmi nyimni ywi she zwimbyi', be bi b̀wum M̀vènnswæb. Yi ba tí bon kwènni lè ywi nyé mè m̀bi, ntwi' se à wòli kan kim à cì tì bon swum ndo'. 'Be ye be mè ci-mfe sàtikà' ke swi' M̀vènnswæb, lè tì ke swi' Yesù Kristò. 'Be ye sa' lè nun m̀ban a kèn wòli d̀wùm ñkæm.

Satèn pyià wì

⁷Kwan se d̀wùm ñkæm yi ye län, be ye Satèn kwannzi ke nye njè. ⁸Li, à yé kèn ke me ñgyò' zwem hwæn, bã nun pòka' b̀wum. Se lisa' le ke Gògè, kònni lè M̀agògè. À yé b̀wum bi swòsi ke cìci fò' bã bon bi kèn wì d̀wì. Ke nswòsi b̀wum màzwùm nun, be ye be mèan wé kye' ye ke moan du'. ⁹Be wa' kèn, be lú ñgyò' hwæn, be kèn myi ye M̀vènnswæb yili kanndi, kònni lè cìci se b̀wum Yesù be tòn kwe. Kwan se bon kanndi bon li, win ndo' wai ke deb, ye busi bon, bon hwæn. ¹⁰M̀vèn mè swæb ne be b̀wum pòkea ni, be bænn nun, be d̀wiò' nun ke swu' win nun, cìci se mveb mpàn be nyènni kwe. Cìci màzwùm, be lè be d̀wià nyàm zwimbyi' mbyi kwe bon lè ci-ntwum me m̀wè'. Vènè' ye bon yenni kwe kpòn lè nywò', shikì se mlò'.

Kyità' she m̀mlòkà'

¹¹Ke nyé yi, m̀n yen gba' lwun twun ndo' she be pwebbi, lè mwum ne be zwem ǹtònmi. Deb bon lè ñgyò' nywuka' ke swi' shon, be yen ka tí yon be. ¹²M̀n yen tì b̀wum ywi, b̀wesò' lè b̀wum ñkæm hwæn, à bi ke swi' gba' lwun dyikea. Mwum ndo' wèli yì d̀wèwà ndo'. D̀wèwà ndo' se be be lon le d̀wèwà nzison be tì ku' kwe, be wèli tì son. 'Be be mwum hwæn ne ywià nùn kyità' lànnzi ke nywi swum se nun be cì wé tà she be kò' ke

dèwà yi nun. ¹³Kwo fe' ßwum bye ywie mlǎ', mè ðu' hwæn kwannzi bon be. Ywi, kònddi lè Ñsòn-ßwum-ywi, be fyɔsi ßwum bye be kwe hwæn. 'Bon hwæn li, be lannzi bon kyitǎ' ke nywi swum se bon be cì nun. ¹⁴Ti lè Ywi, kònddi lè Ñsòn-ßwum-ywi, be ðwið' bon ke swu' win nun. (Ke swu' win màzwùm nun se ßwum ye ywi nyě mè mfi ywi kwe.) ¹⁵Mwum ne jin shon be kǎn kɔa ke dèwǎ nzison nun, be ðwið' ti ku' nun ke swu' màzwùm nun.

Deb she nywæb, lè ñgyɔ' nyě nywæb

21 ¹Ke nyě yi, mùn yen ðeb she nywæb, mùn yen ti ñgyɔ' nyě nywæb. Deb she ndunmi, be lè se nywukeá bon lè ñgyɔ' nyě be mbyí. Du' ndwun be kǎn tí. ²Mùn yen myi sanmi ye jin shon si le Yèrusàlèm she nywæb, se ta kyili ñwai ye ke ðeb ke moan Mvènnswæb. Be lè ye ti fɔsi wě mwɔ' mlib ndɔ' ne fɔsi nywi yon lè nun kenme cí ðæm. ³Mùn ywɔ' ñkwu kimmi ndɔ' ye ta leli, ñkwu màzwùm wai ke gba' lwun zwem, lè ye ta shè le: «Mvènnswæb bænná cí tòn shon jene ke nyinnim ßwum nun, à yě tòn kwe lè bon mban. Li, be ye be ñkwìn ßwum byon. Nun ne', Mvènnswæb yě ku' konni lè bon. ⁴À yě bon mè ðu' kwon ke me'. Ywi bà tí be. Be ba tí ywi shí, shiki be kwe. Vènè' ba tí ku' bon be, ntwi' se mè pwin ywum hwæn be lè ye mlɔá.»

⁵Mwum ne be ke gba' lwun zwem ñtònmi ðunmi leli, à shè le: «Jene, mùn tá ywum hwæn pæ' fyɔsi be nywæb.» À kònddi ti mùn shě le: «Kɔ' ñzǎ' le' ye ke dèwà nun ntwi' se ñzǎ' le' yém yi leŋkǎm, ye be ti ye mwum wòli à tèt' zwùm lè yon.» ⁶Mwum màzwùm shè ti mùn le: «Mè le' hwæn mlɔá. Mùn ne ðyi ñðunmi ywum hwæn, mùn be ti mmlòkà' ywum hwæn. Mùn ni zwimbyi', mùn be ti lwæb be. Mwum ne ñlim ta fyo, mùn yě nun mlǎ' fe ðindin. Mlǎ' màzwùm ta kwan ke mwu ðu' ye ta ñzison fe. ⁷Mwum ne yě wì ñgyɔ' wan lèan, mùn yě nun ðàsi màzwùm fe. Mùn yě be Mvènnswæb nyon, li, à be ku' mwen nyèm. ⁸Son, ti lè mè ci-ncí byebbi, bye mè ci-yi, lè ßwum bye ba ywɔli lè Mvènnswæb, kònddi lè ßwum bye ta mè le' mbyibbɔa cí, lè mè ci-ñwuka' ßwum, mè ci-nzæmmi, lè mè ci-ncikà' me mvili byibbɔa, bye ta yì fòkì mwumzi, lè mè ci-me mbwè', bon hwæn li, cí tòn shan suku' ke swu' win nun, cici se win, kònddi lè mveb mpàn ta nyènni kwe. Cici màzwùm se be ye ywi nyě mè mfi ywi kwe.»

Yèrusàlèm she nywæb

⁹Cikpu' Mvènnswæb ndɔ' kìn ke cì shém. À be ke nyinnim mè cikpu' shanmbi nun bye be lè mè kwêb ke fya'. Mè kwêb màzwùm be lè yì vèné' mmlòkà' ke nlim lwinnɔa. À ðén, à shè lè mùn le: «Kìin, mùn lisà' wù mlib ne Mwen Nzwumngan yě she.» ¹⁰Ke kwan si nun, Mpùn Mvènnswæb bèn mùn nywi. Cikpu' Mvènnswæb twelò' mùn ke mwu kpa' ndɔ' ne be zwozwò. Ke kwe, à lisà' mùn Yèrusàlèm, myi sanmi màzwùm be kyili

ɲwaì ye ke dɛb ke moan Mvènnswàèb. ¹¹ Ìntwu Mvènnswàèb be ke nlim, li, myi yi be d̀wùm̀nà' wě ɲgwà' n̄lwen ndɔ' ne be ta lon le jæsìpè, lè a ta b̀wum m̀e' she wě d̀aen̄ɲglà'. ¹² Bè b̀wemme kwùmkwùm nye twun ndɔ', be kann̄di myi màzwùm. Bè d̀woe mè ɲwum nye wùm b̀làn b̀í. Ke me ɲwum nye wùm b̀làn b̀í ni nun, mè cikpu' Mvènnswàèb be kwe d̀yikea m̀bɔ'-m̀bɔ'. Ke yi plìplì zwem, be kɔe mè myi mè d̀wòn b̀wen Izràèl, à bi wùm b̀làn b̀í. ¹³ Mè ɲwum nye be ìlè-lè ke me fyà' nyí nun hwæn. Se lisa' le, ke b̀wùm-nywɔ', mè ɲwum nye nlè, ke pyi-nywɔ', mè ɲwum nye nlè, ke mbem̀wù, mè ɲwum nye nlè, ke leànn̄ji, mè ɲwum nye nlè. ¹⁴ Mè ɲgwà' ndɔ' be kwe wùm b̀làn b̀í. Ke me ɲgwà' màzwùm zwem, be kɔe mè myin mè ci-ntwum Mwen Nz̄wum̄ɲgan. Mè kwũ kwùmkwùm nye sati ke me ɲgwà' yi zwem.

¹⁵ Cikpu' Mvènnswàèb ne be mùn le' màzwùm shě be lè ìtwà' ndɔ' ye be ci lè g̀ɔl ke fya'. Ìtwà' ye be ye ywum f̀ɔkea nun ye. À wa', à kèn m̀gbòn̄m̀gbòn myi f̀ɔ, à f̀ɔ' tì ku' twutwu mè ɲwum nye, à kònndì l̀aèb l̀aèbbi kwùmkwùm nye f̀ɔ. ¹⁶ Mè fyà' nsòn be nyí, ye cinne l̀aèb l̀aèbbi m̀banm̀ban. Mwum màzwùm f̀ɔ' myi lè ìtwà' yon. L̀aèb l̀aèbbi be swum me kilòmetà ɲkæm m̀bì lè ìd̀u' m̀bì. M̀gbòn̄m̀gbòn myi lè ìl̀aèb ye yon l̀aèbbe ke zwò be m̀banm̀ban. ¹⁷ Cikpu' tòn ni kèn tì ku' kwùmkwùm nye f̀ɔkea. Ìl̀aèb ye kwùmkwùm nye l̀aèbbe ke zwò be mè metà mwum shanm̀bì b̀làn b̀í. À t̀wele m̀b̀òkì màzwùm lè m̀b̀òkì ne b̀wum ta ywum f̀ɔkea nun kwan hwæn. ¹⁸ Bè b̀wemme kwùmkwùm nye màzwùm lè ɲgwà' n̄lwen ndɔ' ne be ta lon le jæsìpè. Tì lè myi ỳòn ne', be gwe yon lè g̀ɔl seansean, ye be pweb wě d̀aen̄ɲglà'. ¹⁹ Mè ɲgwà' be be b̀wemme mè kwũ kwùmkwùm nye be lè mè ɲgwà' l̀wukea kyikyì. ɲgwà' nyě zwimbyi' be nyě be ta lon le jæsìpè. Nyě mè m̀bì be nyě be ta lon le sàf̄ir. ɲgwà' nyě mè nlè be nyě be ta lon le àgatè. Nyě mè nnyì, be lon nun le èm̀èròdè. ²⁰ Nyě mè nshæn, be lon nun le ònisi. Nyě mè mfyuru, be lon nun le k̀ònal̄in. Nyě mè nshanm̀bì be krìzòlì'. Nyě mè nini be bèrìl. Nyě mè ntàenni be t̀òpázè. Nyě mè ɲwùm be klìzòplázè. Kì-wùm b̀làn m̀bɔ' be jæsèn. Kì-wùm b̀làn b̀í be àm̀ètisi. ²¹ Tì lè yì cìcì ndun wùm b̀làn b̀í yi, be cie yon lè mè ɲgwà' ye be ta lon le pèrìl. Bè cie ɲwum nye f̀ɔ' lè pèrìl m̀bɔ' ku'. Mè mbyi be be sænne ke myi be lè g̀ɔl seansean, be be sanmi wě mlà'.

²² Ke myi màzwùm nun, m̀n̄n̄ yen kan nyenswàèb kwe, ntwi' se Nyeli nye' Mvènnswàèb ndwun bon lè Mwen Nz̄wum̄ɲgan bi kwe, bon be b̀wum ta d̀ɔa. ²³ Nywɔ' tà ka d̀wùm kwe, shìkì nywi' pweb ku', ntwi' se ìntwu Mvènnswàèb ta ɲwanni fe. Mwen Nz̄wum̄ɲgan ne d̀yi wě l̀aem. ²⁴ B̀wum be cě ɲgyɔ' zwem ye òyòn kèn̄ni kwe ke nyen ye be ta ɲwanni màzwùm yenni. Li, mè mvèn b̀ye cě ɲgyɔ' zwem shì tì ku' ɲjònndì nyan. ²⁵ Mè ɲwum nye yě su' tòn kwan hwæn ìl̀wonl̀won, ntwi' se kpòn bà tì pyì ke myi màzwùm nun. ²⁶ Ìntwu ye ɲgyɔ' wan, kònndì lè ɲjònndì, be ye kìn lè yon ke myi màzwùm. ²⁷ Son, ywum b̀yib̀b̀ɔa ba d̀un kwe, shìkì mè ci-ncì

byebbi bon lè mè ci-mε mɔwè' kɛɔ' mwù kwe. Suku' ɔwum bye mè myin yan ni ñkɔa ke dèwǎ nzison nun, bon ɓe ye dun kwe. Dèwǎ màzwùm, she Mwen Nzwumɲgan se.

22 ¹Ke nyě yi, cikpu' Mvènnswàb ni lisà' mùn dú' nyě tǎ ɓwum ñzison fe. Du' màzwùm ɓe dɔwùmna' wě dǎnɲɲǎ'. Mwù dú' màzwùm wai ke gba' lwun se Mvènnswàb cinni nun bon lè Mwen Nzwumɲgan. ²À ɓe kyì ke nlim mbyi ne ɓe ke myi màzwùm nun. Ke moan dú' ni, mè ñjì ɲgǎ' ɓe ta ɓwum ñzison fe twàbbe kwe mè fyà' bí hwæn. ɓe ta san ke dɔwùm fɔ' nun yì kǎmmí wùm bílan bí. Nywi' ɓe làn mɔɔ', ɓe san yì gwùm. Man me ɲgǎ' màzwùm ɓe tì ku' mvili, ye ɓe ɓwum ɓe cě ɲgyɔ' zwem mè ɲgwèɲgwèɲ kimnzi. ³Ñke Mvènnswàb ɓa tí ɓwum ɓǎnni ke myi màzwùm nun. Mvènnswàb yě gba' lwun shon yě bon lè Mwen Nzwumɲgan. Li, mè ci-ncí she ɓyon ye nun mwumnzi. ⁴Be ye ɓǎn swi' shon yenni, li, ɓe kɔ' ku' bon jin shon ke swi'. ⁵Kpòn ɓà tí pyì kwe. ɓe ɓa tí lǎm nyǎnnzi, shikì nywɔ' dɔwùm ku', ntwi' se ɲwanni Nyeli Mvènnswàb ye dɔwùm kwe. Li, ɓe ye lwun sea kwan hwæn.

⁶Ke nyě yi, cikpu' Mvènnswàb shè lè mùn le: «Ñzǎ' le' ye yi ye lɛɲkǎm, ye ɓe tì ye mwum wòli à tɛ' zwùm lè yon. Nyeli nye' Mvènnswàb ne tǎ mè ci-nleli ke ɲwum yon nun Mpùn nyon fyi ke nywi, à fyiâ cikpu' nyon ɓǎ nun kiin mè ci-she ɓyon swum se kà ɓènkà' lisea.» ⁷Yesù shè le: «Ywǎèni fe', mùn tǎ kìn ke kwan kwǎ' nun. Tǒn lwen si lè ɓwum bye ta ñzǎ' le' ye Mvènnswàb kwási ke dèwǎ se nun ywo, ɓe mwumnzi yon.»

⁸Mùn Jân, mùn yennâ ywum màzwùm lè ze', mùn ywɔ' tì yon lè ywi'. Kwan se mùn ywɔ' yon li, mùn kònddì yon yenni, mùn kèn switì ke me kwù cikpu' Mvènnswàb nyě ɓe mùn ywum màzwùm lisea ɓǎ mùn mwumnzi nun. ⁹Son, à kà shě lè mùn le: «Ba wù cì li. Mùn ni ku' ci-she wě wù, mùn kònddì ɓe wě mè ɲgyinni ɓyú mè ci-nleli ke ɲwum Mvènnswàb nun, lè tì wě ɓwum ɓe ta ñzǎ' le' ye dèwǎ se nun ɔwon. Son, mwumnzi Mvènnswàb.» ¹⁰Ke nyě yi, à kònddì tì mùn shě le: «Ba wù gwùmnnzi ñzǎ' le' ye Mvènnswàb kwási wu ke dèwǎ se nun. Ntwi' se ywum màzwùm ye ɓèn mbyìmmi. ¹¹Ke à si li, ɓwum ɓe ta ɓyebbi cí, ɓe ken lè mbyì lè ñcì ɓyebbi yan. ɓwum ɓe yili mè le' kwènnjin, ɓe ken mbyì lè kwù kèn shan. Ti lè ɓwum ɓe ta lwen cí, ɓe ken mbyì lè ñcì lwen yan. Mwum ne ɔyi ñsanmi ke swi' Mvènnswàb, à ken mbyì lè ñɔwon Mvènnswàb.»

¹²Yesù shè le: «Mùn tǎ kìn ke kwan kwǎ' nun. Mùn yě kìn lè ɔàsì fya', mùn fe mwum hwæn ke she se nun cìe nun. ¹³Mùn ni ñɔunmi ywum hwæn, mùn ɓe tì ku' mmlǎkà' ywum hwæn, mùn ni zwimbyi', mùn ɓe tì lwàb ɓe. ¹⁴Tǒn lwen si lè ɓwum bye ta mè plè ɓyan sǎbbi. ɓon ɓe cinni mbyi ne ɓon ye dun ke myi màzwùm nun, ɓe ji tì ku' gwùm ɲgǎ' se ta ɓwum ñzison fe. ¹⁵Ti lè mè ci-ncí ɓyebbi, mè ci-ncikà' me mvili ɓyibɔa, mè ci-nzæmmi, mè ci-hwǎn, mè ci-ɲwuka' ɓwum, mè ci-mwumnzi yi

fɔ̀kì, lè ɓwum ɓye yili ñshè me mɓwè', ɓon hwæn li, ɓe ɓa ɗun ke myi màzwùm nun.

¹⁶«Mùn Yesù, mùn ne fyii cikpu' nyèm ɓă nun kiin ywum màzwùm sannzi lè mè ñkwìn ɓwum ɓyêm. Mùn ni ke mvu ɓwum mvèn Dàvíd nun, mùn ni tì ku' nywæ' ne tă ɗwùm moan shikpon.»

¹⁷M̀p̀ùn Nsanmi ɓon lè m̀lib ɗæm, ɓe ta shè m̀banmban le: «Kîin!» Mwum ne ñlim ta fyò, à kiin mlă' ye ta ñzison fe yě. Mwum ne yili yon, ɓe ye nun yon fe ɗindín.

¹⁸Byin ɓe ywɔâ ñzæ' le' ye M̀v̀ennswæb kwàsi ke ɗewà se nun, konnèni. Mùn Jân, mùn shè byin le a mwum ndɔ' lwùm ñzæ' le' ndɔ' kònndi mbyí ke ywum ye mùn kɔ' ke ɗewà se nun, M̀v̀ennswæb yě nun yì vènè' kònndi ke nywi wě tà she ɓe kɔ' ke ɗewà se nun. ¹⁹Mwum ndɔ' lwùm ñzæ' le' ndɔ' njìli wě tà she mùn kɔ' ke ɗewà se nun, M̀v̀ennswæb ɓà nun ɗunnzi ke myi, shikì à fe ku' nun gwùm ñgæ' she ta ɓwum ñzison fe.

²⁰Mwum ne ɗyi ke le' màzwùm nun kimmi tă shè le: «À si li, mùn tă kìn ke kwan kwæ' nun.» Bwi' yili le se ɓe li. Nyeli nye' Yesù, kîin!

²¹Nyeli nye' Yesù ñgænni byin, byin hwæn.